

弘

簡

錄

弘簡錄卷二百十五

載記 金主之二

太宗皇帝諱吳乞買改諱晟世祖第四子生遼太康元年乙卯
初爲穆宗養子太祖親愛之遇征伐常留居守天輔五年賜詔
曰汝惟朕之母弟義均一體是用貳我國政凡軍事違者罔貸
其罪從宜處之其餘事無大小一依本朝舊制七年又詔今遼
主盡喪其師奔于夏國遼官特列遙設等刼其子雅里而立之
已留宗翰等措畫朕親巡已久功亦大就所獲州部正須綏撫
是用還都八月中旬可至春州汝率內戚迎我若至豹子崖尤
善太祖旣崩國論勃極列杲鄆王昂宗峻宗幹及百官請正帝

位不許固請至三以赭袍被體寅璽懷中從之己未告祀天地
丙寅大赦中外改是年爲天會元年癸酉發春州粟賑降人之
徙上京者戊寅詔諸猛安賦米給戶口在內地匱乏者十月壬
辰詔以空名宣頭百道給宗翰以便宜遷授勿待奏請恐致稽
滯己亥上京慶元寺僧獻佛骨却之閣母及張覺戰于兔耳山
閣母敗績十一月壬戌復以空名宣頭及銀牌給上京路軍帥
實古廂婆盧火等癸亥詔諭南京割武朔二州入于宋勃堇幹
魯別及勃刺速破走乙室白答於歸化己巳徙遷濶來臨四州
之民于濟州庚午宗望及張覺戰于南京東大敗之覺奔宋王
申張忠嗣以南京降遣使入諭城中復叛己卯詔女直人有先
附於遼今復被獲者悉從其所欲居而復之其奴婢部曲金聽
爲民十二月辛巳詔咸州以南復州以北年穀不登其應輸南

京軍糧免之甲午又詔比問民間乏食稱貸于人至有鬻其子者其聽以丁力等者贖之是日以杲爲諱班勃極烈宗幹爲國論勃極烈遣勃董季靖如宋告哀二年正月庚戌朔設都訶叅議國政壬子諭克南京功賞幹不赦罔母罪戊午詔李董完顏阿實賚先帝以同姓之人有自鬻及典質其身者命官爲贖今聞尚有未復者其悉開贖之癸亥詔東京北穀不登減田及市租各半甲戌西南西北兩路都統請勿割山西郡縣與宋土以違先帝之命其速與之乙亥夏國奉表稱藩詔以下寨以北陰山以南乙室耶剌部吐祿深西之地與之丙子貽宋書索俘獲叛亡丁丑始自京師至南京每五十里置驛二月詔有盜發遼諸陵者罪死丁酉命徙移懶路都孛董完顏忠于蘇瀕水乙巳詔諭南京官僚小大之事必關自軍帥無得專達朝廷凡

留守及諸闕員可選勲賢及有人望者就注擬之具姓名官階以聞三月己酉朔命以宋歲幣銀絹分賜六部東京及宗室將士之有功者庚戌降詔釋叛人活字帶等己未南京劉公冑王永福棄家踰城來降授公冑廣寧君永福奉先軍節度使辛未夏國王李乾順遣使上誓表閏月戊寅朔賜夏國誓詔辛巳命置驛上京春秦之間乙丑烏虎里廸烈底兩部來降丙午罷許割山西諸鎮與宋是月斜野襲遙輦昭古牙走之獲其妻孥羣從及豪族勃董渾駁等破奚七歲而撫其民人四月己酉命宗翰經略西夏賞破遼功辛亥賑上京西北兩路降者及新徙嶺東之人戊午賜上京新築城名會平州乙亥詔贖上京路新遷寧江州戶口賣身者六百餘人宋遣使來弔喪以高木僕古等充遣留使高興輔劉興嗣等充告卽位使如宋五月丁丑朔上

京軍帥賁古廼以所獲印綬二十二及銀牌來上癸未詔今方
農時新降之民訴訟者衆或失田業可俟農隙聽決乙巳詔曷
懶路軍帥完顏忽剌古等自今以小故起戰爭甚非所宜後非
奉命毋輒往高麗境內捕海狗海東青鴉鵲等物六月閏母克
南京殺都統張敦固七月丙戌禁外方便介冗從多者壬辰又
詔鶻實等高麗納吾叛亡增其邊備其曲在彼凡有過問毋違
常式或來侵略整爾行列與之從事敢先犯彼雖捷必罰乙未
烏虎部及諸營叛命昱等討平之八月乙巳朔以孛董烏瓜乃
等賀宋生辰丁巳六部都統撻懶擊走遙輦昭古牙殺其隊將
曷魯燥白撒曷等昭古牙率衆來降又破駱駝山金源諸軍興
中府降詔增給銀牌十月甲辰朔夏國遣使謝誓詔戊午立帝
生日爲天清節宋夏遣使來賀甲子詔發寧江州粟賑泰州民

被秋潦者丙寅詔有司運米五萬石于廣寧以給南京潤州戍
卒以五萬給捷懶實古廼命閣母以甲士千人益合蘇館路宇
董完顏阿實資以備高麗戊辰兩路都統奏遼詳穩捷不野來
降言耶律大石自稱爲王遼主駐余都谷從者不過四千有步
騎萬餘欲趨天德詔酌事宜而行十二月戊申以宇董高居慶
等爲賀宋正旦使

以後遣使不錄

三年正月癸酉朔宋夏遣使來賀

戊子同知宣徽院事韓資正加尚書左僕射爲諸宮都部署二
月壬戌婁室奏獲遼主詔以赴京丁卯分龐葛城地授所徙烏
虎里廸烈二部及契丹民三月丙子賑奚契丹新附之民辛巳
建乾元殿幹魯以謀葛失來附請授印綬六月庚申以獲遼主
遣李川和等如宋告慶七月己卯南京奏錦州野蠶成繭奉其
絲綿來獻命賞其長吏詔內外權勢宗室毋得私役百姓及買

貧民爲奴甲申詔南京括官豪牧馬以等第取之分給諸軍八月癸卯遼主延禧至京甲辰告太祖廟丙午入見降封海濱王仍詔中外九月壬午廣寧府獻嘉禾癸巳保州路都孛藍加古撒曷有罪伏誅以孛董徒單烏烈代之十月甲辰詔杲及宗翰宗望撻懶開母耶律余覲等伐宋乙巳建太祖廟于西京丁未召耶魯赴京師教授女直字壬戌大有年令每謀克賦牛一具粟一石爲一廩貯之甲子宋易州將韓民毅降處之蔚州十一月辛卯以張忠嗣權簽南京中書樞密院事十二月庚子宗翰下朔州甲辰宗望諸軍及宋郭藥師張企微劉舜仁戰于白河大破之蒲葦敗宋兵于古北口丙午藥師降蒲察繩果以三百騎遇中山戍兵三萬於阨隘之地力戰死之朮烈速活里改軍繼至殺二萬餘人戊申宗翰克代州乙卯中山降丙辰宗望破

宋兵五千于真定戊午宗翰圍太原余睹破宋河東陝西援兵于汾河北甲子宗望克信德府 四年正月丁卯朔始朝日戊辰宗弼取湯陰大吳攻下潞州廸古補取黎陽己巳諸軍渡河庚午取滑州宗望使吳孝民等入汴取宋首謀平山童貫譚稹詹度及張覺等宋太上皇出奔癸酉諸軍圍汴甲戌宋使李悅等來謝罪且請脩好許割太原中山河間三鎮地增納歲幣戊寅宋康王構少宰張邦昌出質辛巳宋上誓誓地圖稱姪大宋皇帝伯大金皇帝癸未諸軍解圍二月丁酉朔夜宋將姚平仲兵襲宗望營敗之己亥復進師圍汴宋使宇文虛中以書來攻質肅王樞遣康王構歸師還壬子以滑潞二州與宋宗翰定威勝軍攻下隆德府丁巳次澤州三月癸未銀术可圍太原宗翰還西京四月癸卯宗望使宗弼來奏捷獻所獲三象乙丑耿守

忠等大敗宋人于西都谷五月癸酉拔禹速又敗姚古軍於隆
州谷六月丙申朔高麗國王楷奉表稱藩七月丙寅遣高伯淑
等宣諭高麗八月庚子復詔伐宋甲寅新城縣進白鳥九月丙
寅宗翰克太原己巳復以南京爲平州十月丁未中京進嘉禾
十一月甲子宗翰發太原丙寅宗望自真定同趨汴戊辰下威
勝軍癸酉撒刺荅破天井關乙亥克隆德府庚辰克澤州諸軍
渡河丙戌克懷州遂至汴京閏月丙辰克汴城辛酉宋主桓出
居青城十二月癸亥降之庚辰詔曰朕惟國家四境雖遠而兵
革未息田野雖廣而畎畝未闢百工略備而祿秩未均方貢僅
脩而賓館未贍是皆出乎民力苟不務本業而抑游手欲上下
皆足其可得乎其令所在長吏敦勸農功五年正月辛卯朔
高麗夏遣使同賀宋降癸巳諸臣來上宋降表乙未知密院劉

彥宗請復立趙氏不聽丁巳回鶻喝里可汗遣使入貢二月丙寅俘宋二帝至京降爲庶人三月丁酉立張邦昌爲大楚皇帝又割地以賜夏國五月庚寅朔宋康王卽位於歸德殺張邦昌六月庚申詔自河北旣分重念其民不無疑懼堅兵自守若卽討伐生靈可憐其申諭以理招輯安全之儻堅執不移然後致討諸軍敢有利於俘掠輒肆蕩毀者當底于罰庚辰宗望薨宗輔代爲右副元帥八月戊寅遣耶律居謹等充宣慶使以宋捷詔高麗丙戌詔河北河東郡縣職員多闕命開貢舉取士以安新民其南北進士各以所業試之九月丁未詔內地諸路每耕牛一具賦粟五斗以備歉歲十月丁卯沙州回鶻活刺散可汗遣使入貢辛未徙宋二帝自燕居于中京六年正月上聞宋主渡江時東作方興留大軍夾河屯田召諸將還山西二月癸

宋鄭州叛歸于宋命復取之遂遷洛頴汝鄭均房陳蔡并襄鄧
唐民于河北三月壬辰命南路軍帥實古廼通閱節度使完顏
慎思所領諸部其未置猛安謀克戶口具籍來上五月戊戌移
沙土古思以本部來附六月己未詔求祖宗遺事真定賊自稱
元帥秦王撒剌喝討平之七月乙巳宋主遣使奉表請和詔進
兵追伐以宋二庶人赴上京八月丁丑告于太祖廟二庶人以
素服見畢入見于乾元殿封其父昏德公子重昏侯是月詔頒
州郡職員名稱及俸給因革于中外十月戊寅徙昏德公重昏
侯于韓州庚辰命諸將會兵伐宋十一月壬辰賑移懶路乙未
婁室攻晉寧軍守將徐徽言固守不能克七年二月戊辰宋
麟府路安撫使折可求以麟府豐三州降己巳婁室塞里鴆沙
虎等破晉寧軍其守徐徽言據子城拒戰庚午率衆潰圍走擒

之使之拜不拜臨之以兵不動命降將折可求諭降徽言指可求大罵出不遜語遂殺之其統制孫昂及士卒皆不赦盡殺之甲戌詔禁醫巫閭山遼代山陵樵採三月壬寅詔軍興以來良人被驅略者聽其血屬贖之左僕射高貞罷以韓企先代之仍兼侍中五月乙卯拔离速等襲宋主于揚州不及奔于江南宗弼等引兵追襲之十一月庚戌徙曷蘇館都統司治寧州丙辰宗弼取和州壬戌渡江敗杜充軍丁卯江寧守陳邦光以城降十二月丙戌宗弼取湖州丁亥克杭州遣將追宋主于四明越州降戊戌敗宋兵于東關濟州娥江壬寅敗宋兵于高橋宋主入于海八年正月己未阿里蒲盧渾克明州執守臣趙伯諤庚申阿魯補斜里也下太平順昌及濠州杜充降二月乙亥宗弼還自杭庚寅取秀州戊戌取平江汴京亂三月丁卯大廸里

復取之宗弼及宋將韓世忠戰于鎮江不利四月丙申復戰于江寧敗之諸軍還渡江是日阿魯補戰于拓皋己亥周企戰于壽春辛丑婁室戰于淳化皆勝之降醴州及克邠州五月戊申詔簽河北河東軍其家屬有流寓河南被俘掠爲奴婢者官爲贖之俾復其業六月壬申詔遣遼統軍使耶律曷禮質節度使蕭別剌等十人分治新附州鎮癸酉詔以昏德公六女爲宗婦七月丁卯上如東京溫湯徙昏德公重昏侯于鶻里改路九月戊申立劉豫爲大齊皇帝世脩子禮都大名府癸亥詔獎宗輔等敗宋張浚軍于富平降耀州鳳翔十月乙亥上至自東京齊帝劉豫遣使謝封冊甲申以鉞驪突离刺同中書門下平章事詔遼宋官上本國詰命等第換授十一月庚戌遣還鎮節度使烏克壽等爲齊劉豫生日使

九年正月己亥朔齊使來賀

戊申命籍徙門水以西渾墮星顯僞益三水以北開田給曷懶
路諸謀克辛亥蒲察鶻拔魯完顏忒里計張萬敵于白馬湖陷
于敵癸丑張忠嗣以宣政殿大學士知三司使事四月己卯詔
賑恤新徙戍邊戶有典質親屬者官爲贖還給以官牛委官勸
督田作其績遷戍戶在中路者姑止之五月丙午分遣使者諸
路勸農六月壬辰賜昏德公重昏侯時服各兩襲八月辛巳回
鶻隈欲遣使來貢九月己酉和州回鶻執耶律大石之黨撤入
迪里突迭來獻十月戊寅天清節齊使來賀宗弼與宋吳玠戰
于和尚原敗績十一月己未遷趙氏疎屬于上京以陝西地賜
齊一十年正月己酉齊表謝賜地壬子詔如遼制均士庶之族
賦役皆有等差二月庚午賑上京路戍邊猛安民四月丁卯宗
翰朝京師庚午以太祖孫亶爲諱班勃極烈皇子宗盤爲國論

忽魯勃極烈宗幹爲國論左勃極烈宗翰爲國論右勃極烈宗
輔爲左副元帥庚寅賜綠混同江暴漲命賑徙戍江邊戶閏月
辛卯詔分遣勸沙虎等十二人閱諸路丁壯調赴軍七月甲午
上如中京賑泰州路戍邊戶九月余睹謀反出奔其黨燕京統
軍使蕭高六伏誅蔚州節度使蕭特謀葛自殺十月壬寅天清
節大赦上如興中府齊遣使來告母喪十一月癸亥遣武良護
弔祭于齊癸未從撤齒喝請取劔外十三州部族節度使土古
厮捕斬余睹及其諸子函首來獻十二月庚子上至自興中府
十一年正月丁卯撤齒喝敗吳玠于饒峰關二月己亥詔賑
軍士八月甲申命黃龍府置錢帛司戊子趙撈誣告其父昏德
公謀反及其婿劉文彥伏誅戊戌詔比以軍旅未定皆命帥府
擇人授官今並從朝廷遷注十一月丙寅賑移懶路十二月癸

未賑曷懶路 十二年正月甲子初改定制度詔示中外以韓
企先爲尚書右丞相丙寅如東京二月丁酉撤离喝敗宋吳玠
軍于固鎮四月至自東京六月甲午以阿盧補爲元帥右都監
十三年正月己巳帝崩于明德宮年六十一庚午諡班勃極
烈卽皇帝位于柩前三月庚辰上尊諡曰文烈皇帝廟號太宗
乙酉葬和陵皇統四年改號恭陵五年增上尊諡曰體元應運
世德昭功哲惠仁聖文烈皇帝貞元三年十一月戊申改葬于
大房山仍號恭陵 帝在位十三年不好弋獵不嗜聲樂宮室
苑飾無所增益始天輔草創未遑禮樂之事旣滅遼舉宋卽議
禮更制創立法度治曆明時繼以武功遠以文事經國規模綽
有可觀未聽大臣計傳位熙宗使太祖世嗣不失正緒回視宋
初可謂行所甚難矣

載記 金主之三

熙宗皇帝諱合剌改名亶父豐王宗峻母蒲察氏天輔三年己亥歲七月七日生天會十年宗翰宗輔希尹與宗幹議自杲薨後諸班勃極烈儲位久虛今不早定恐授非其人合剌太祖嫡孫當立相與請於太宗四月庚午下詔定爲儲副戒無自謂冲幼狎于童戲惟敬厥德卽位以生日同皇考忌辰改立正月十七日爲萬壽節三國各遣使來賀甲戌詔中外公私禁酒癸酉遣使告哀于齊高麗夏及報卽位仍詔齊自今稱臣勿稱子三月己卯三國使來弔祭戊戌詔諸國使賜宴不舉樂四月甘露降熊岳縣戊午三國遣使賀卽位丙寅昏德公薨遣使致祭及賜贈九月壬申追尊皇考爲景宣皇帝廟號徽宗皇妣惠昭皇后改葬興陵戊寅尊太祖后紇石烈氏太宗后唐括氏皆爲太

皇太后十一月乙亥初頒曆己卯以元帥希尹爲左丞相兼侍
中太子少保高慶裔爲左丞平陽尹蕭慶爲右丞己丑建天開
殿于文刺十二月癸亥始定齊高麗夏朝賀及賜宴朝辭儀賜
農民以京西鹿田十四年不改元文移署年止用天會正月
己巳朔上朝太皇太后于兩宮癸酉頒曆于高麗丁丑太皇太
后紇石烈氏崩二月癸卯奉上大行皇太后尊諡丙午附葬睿
陵三月壬午以太保宗翰太師宗磐太傅宗幹金領三省事丁
酉三國遣使來弔八月丙辰追尊九代祖以下曰皇帝皇后定
始祖景祖世祖太祖太宗廟皆不祧十月甲寅以吳激爲高麗
王生日使蕭仲恭爲齊回謝并生日正旦使十五年正月癸
亥朔初用大明曆上朝太皇太后于明德宮六月庚戌尚書左
丞高慶裔轉運使劉恩有罪伏誅七月丙戌夜京師地震己亥

汰兵興濫爵十一月丙午廢齊國降封劉豫爲蜀王荒行燕尚書省于汴十二月戊辰豫上表謝封爵徙之臨潢府癸未詔改明年元大赦命韓昉耶律紹文等編脩國史

天眷元年正月戊子朔朝明德宮乙卯頒女直小字二月壬戌如爻刺春水乙丑幸天開殿已巳詔罷來流水混同江護遷地與民耕牧三月庚寅給禁苑隙地於百姓四月丁卯命少府監盧彥倫營建宮室止從儉素壬午朝享天元殿五月已亥詔以經義詞賦兩科取士六月戊午還宮七月丁酉按出澣河溢壤廬舍民多溺死八月甲寅朔頒行官制癸亥回鶻遣使朝貢已卯舉河南地與宋以京師爲上京府曰會寧舊上京爲北京九月乙未詔女直契丹漢人誥命各用本字渤海同漢人丁酉改燕京樞密院爲行臺尚書省以蕭寶耶律暉爲平章政事戊戌

朝明德宮己酉省燕中西三京平州東西等路州縣十月甲寅朔以御前管勾契丹文字李德固爲叅知政事己巳禁親王以下佩刀入宮十一月丙辰康宗以上畫像工畢奠獻于乾元殿十二月癸亥新宮成丁丑立貴妃裴滿氏爲皇后二年二月乙未上如天開殿三月丙辰命百官詳定儀制四月甲戌百官朝叅初用朝服己卯宋遣使謝河南地五月乙巳還宮六月己酉朔初御冠服辛亥吳十謀反伏誅己未上語韓昉朕每閱貞觀政要見其君臣議論大可規法對以當時太宗溫顏訪問房杜輩竭忠盡誠其書雖簡足以爲法又問明皇何如昉曰初以艱危得位用姚崇宋璟惟正是行故能成開元之治末年怠于萬機委用李林甫姦諛故致天寶之亂苟能慎終如始則貞觀之風不難追矣上稱善又問周成王何如昉曰古之賢君上曰

以朕觀之亦由周公輔相之力後世疑周公殺其兄正爲社稷
大計不當非之七月辛巳宗磐宗雋謀反伏誅八月辛亥復誅
反者撻懶及翼王鶻懶九月戊寅朔降封太宗諸子丙申初居
新宮立太祖原廟于慶元宮壬寅宋遣王倫等乞歸父喪及母
華氏等拘倫不遣十月癸酉夏國使來告喪三年四月乙巳
朔溫都思忠廉問諸路得廉吏杜遵晦以下百二十四人各進
一階貪吏張軫以下二十一人皆罷之丁丑上如燕京五月丙
子詔復取河南陝西地巳卯詔開李仁孝爲夏國王是月河南
平六月陝西平宗弼遣使奏捷上次涼涇大旱使蕭彥謨田穀
決西京囚七月丁卯詔文武官五品以上致仕給俸祿之半職
三品者仍給僉人八月辛巳詔撫諭陝西五路壬午初定公主
郡縣主及駙馬官品九月戊申上至燕京巳酉親饗太祖廟庚

中夏國遣使謝賜贈又謝封冊十二月乙亥宗弼奏宋將岳飛張俊韓世忠率衆渡江命擊之丁丑地震

皇統元年正月庚戌羣臣上尊號曰崇天體道欽明文武聖德皇帝初御袞冕癸丑謝太廟大赦改元己未初定命婦封號夏國請置榷場許之二月乙酉改封耶律延禧爲豫王昏德公爲天水郡王重昏侯天水郡公己未宴羣臣于瑤池殿適宗弼遣使奏克廬州捷侍臣多進詩稱賀帝覽之曰太平之世當尚文物自古致治皆由是也七月癸卯以景宣皇帝忌辰命尚食徹肉九月戊申上至自燕京朝太皇太后于明德宮賜鰥寡孤獨不能自存者人絹二疋絮三斤是秋蝗宗弼伐宋渡淮安乞罷兵十一月己酉高麗夏國賀受尊號辛亥稽古殿火十二月天水郡公趙桓乞本品俸詔賜濟之左丞勛進先朝實錄三卷上

焚香立受 二年正月己亥獵來流河乙巳命伐高麗丁未遷
宮二月丁卯如天開殿甲戌賑熙河路戊子皇子濟安生大赦
辛卯宋遣端明殿學士何鑄等進誓表稱臣構言今來盡疆合
以淮水中流爲界自鄧州西四十里并南四十里爲界隸唐鄧
州制屬上國其外並西南盡屬光化軍爲徹邑公邊州城旣蒙
恩造許備藩方世世子孫謹守臣節每年皇帝生辰并正旦遣
使稱賀不絕歲貢銀絹二十五萬兩匹自壬戌年爲首每春季
差人般送至泗州交納有渝此盟明神是殛壬辰改封劉豫曹
王三月辛丑還宮大雪丙辰遣左宣徽使劉若以袞冕圭冊冊
宋皇帝歸其母韋氏故妻邢氏并父母三喪冊文皇帝若曰咨
爾宋康王趙構不弔天降喪于爾邦亟潰齊盟自貽顛覆爾越
在江表用勤我師十有八年于茲朕用震悼斯民其何罪今天

其悔過誕誘爾衷封奏仰至願身列于藩輔今遣光祿大夫等持節冊爾爲帝國號宋世服臣職永爲屏翰賜以人口牛馬各千駝百羊萬每歲宋國進貢內仍給銀絹二千兩匹戊午皇子濟安彌月上始正名定制立以爲皇太子赦天下丙寅告宋通和庚午五雲樓重明等殿成宴羣臣上荒于酒與近臣飲或繼以夜宰相入諫輒飲以酒曰知卿等意今旣飲矣明日當戒因復飲五月癸巳朔不視朝乙卯賜宋誓詔七月甲午回鶻遣使來貢是秋北京廣寧府蝗八月辛未復太宗子胡盧爲王賑陝西九月壬辰詔給天水郡王子姪塔并孫天水郡公子及婿俸祿十二月庚午宋遣使來謝壬申獵于核耶朮米路癸未還宮甲申皇太子濟安病劇上與后幸佛寺祈禱曲赦罪囚是夜薨諡曰哀悼三年正月己丑朔以皇太子喪不御正殿羣臣

詣便殿稱賀宋高麗夏使詣皇極殿遙賀乙巳萬壽節如正旦
儀三月丁酉太皇太后唐括氏崩己酉封子道濟爲魏王五月
丁巳朔京兆進瑞麥甲申初立太廟社稷六月己酉初置號毅
軍七月庚辰太原路進獬豸并瑞麥八月乙巳諡太行太皇太
后戊申附葬恭陵四年正月癸丑朔宋高麗夏遣使來賀甲
寅詔以去年宋幣賜始祖以下宗室乙丑陝西進嘉禾十有二
莖莖皆七穗二月癸未上如東京丙申次百泊河春水丁酉回
鶻遣使來賀以粘合韓奴報之五月辛亥朔次薰風殿七月庚
午建原廟于東京八月癸未殺魏王道濟九月乙酉上如東京
壬子畋于沙河射虎獲之十月乙卯遣使祭遼主陵辛酉詔薰
風殿二十里內及巡幸所過五里內並復一歲十一月壬辰立
借貸饑民酬賞格甲辰河朔諸郡地震詔復百姓一年其歷死

無人收葬者官爲斂藏之陝西蒲解汝蔡等處歲饑典雇流民
爲奴婢者官贖爲良放還十一月己酉獵于海島十二月甲午
至東京 五年二月乙未次濟州春水三月戊辰次天開殿五
月戊午初用御製小字壬申平章政事勗諫止止酒從之仍布
告廷臣九月庚申還京十月辛卯增諡太祖閏月戊寅大名府
進牛生麟壬辰懷州進嘉禾十二月戊申增諡始祖以下十帝
及太宗徽宗丁巳赦 六年正月壬申封太祖諸孫爲王乙亥
賊于謀勒甲申還京庚寅以邊地賜夏國王辰如春水從禽導
騎快入大澤中帝馬陷因步出不罪導者四月庚子朔還京六
月乙丑高麗王楷薨遣使弔祭并起復嗣王覲九月戊辰朔以
許王破汴睿宗平陝西鄭王克遼及婁室銀木可皆有大功並
爲立碑是歲道粘割韓奴招耶律大石被害 七年正月癸未

以西京鹿園爲民田三月戊寅高麗遣使謝弔祭起復四月戊午宴便殿上醉酒殺戶部尚書宗禮七月己巳太白經天幽赦

歲內十一月乙亥兵部尚書秉德進三角羊

八年二月壬子

以哥魯葛波古等使高麗夏國甲寅大理卿宗安等同封高麗王琨乙卯如天開殿四月辛丑遣叅知政事秉德與烏林荅蒲盧虎等廉察官吏庚戌還京甲寅遣史成六月乙卯高麗王遣使謝封冊七月戊寅責左丞唐括辯奉職不謹杖之八月戊戌宗弼進太祖實錄上焚香立受之閏月庚申宰臣請上獵恐害稼不允丙寅太廟成十一月乙未左丞相宗賢左丞稟等言州郡長吏當並用本國人上曰四海之內皆朕臣子若分別待之豈能致一自今本國及諸色人量才通用之九年四月壬申夜大風雨雷電震壞寢殿鴟尾有火入上寢燒幃幔帝趨別殿

避之丁丑有龍圖於利州榆林河水上大風壞民居官舍瓦木人畜皆飄颺十數里死傷至數百人五月戊子曲赦上京四丁丑天變肆赦怒殺翰林學士張鈞八月庚申從宰臣議徙遼陽渤海之民於燕南侍從高壽星等當遷訴於后以言激使上怒議者杖平章秉德殺左司郎中三合壽星竟得不徙十月乙丑殺北京留守胙王元及弟安武軍節度使查剌左衛將軍特思武庫令耶律八斤妄稱上言宿直將軍蕭榮與元爲黨誅之十一月癸未殺皇后裴滿氏名胙王妃撒卯入宮癸巳上獵于忽刺渾土溫遣使殺德妃烏古論氏夾谷氏張氏十二月己酉朔還宮丙辰殺妃裴滿氏於寢殿丁巳平章亮因羣臣震恐夜二鼓弑帝時年三十一降爲東昏王葬后裴滿氏墓中貞元三年改大房山之蓼香甸諸王同兆域大定初追諡武靈皇帝別立

廟號曰閔宗十九年升祔太廟增諡弘基繼武莊靖孝成皇帝
二十七年改廟號熙宗明年改葬娥眉谷陵曰思陵帝卽位之
初四方無事臨朝端默敬禮大臣宗翰宗幹宗弼相繼秉政廟
算制勝齊國就廢宋人請臣吏清政簡百姓樂業及宗弼旣沒
舊臣亦多物故內制強后心不能平因無聊賴縱酒酣怒人懷
危懼以致于亡惜哉

載記 金主之四

廢帝海陵諱廸古乃改諱亮字元初太祖庶孫父宗幹母大氏
以天輔六年壬寅歲生天眷三年年十八授奉國上將軍赴宗
弼軍前任使以爲行軍萬戶遷驃騎上將軍皇統四年加龍虎
衛上將軍光祿大夫爲中京留守爲人僞惡多猜忌殘忍任數
熙宗以嫡孫嗣位輒懷覬覦在中京專務立威以厭伏小人七

年五月召爲同判大宗正事加特進拜尚書右丞轉左丞務攬持權柄用其腹心爲臺省要職一口因召對謝及太祖創業艱難嗚咽流涕熙宗以爲忠八年六月拜平章政事十一月轉右丞相九年正月兼都元帥值生日上以司馬光畫像玉吐鶻底馬遣小底大興國賜亮聞悼后亦附賜禮物熙宗不悅杖興國百迫其賜物興國懷怨亮由此不自安三月拜太保領三省事益邀求人譽引用勢望子孫結其驩心四月學士張鈞草詔忤旨熙宗問誰使爲之左相宗賢以太保對怒之出領行臺尚書省事至良鄉召還初尚莫測所以見召之意大恐旣至復位意益危迫時唐括辯與乘德皆以事被杖亦懷怨望同謀廢立令烏帶告亮言我輩不能匡救旦暮必有禍亮問若舉大事誰可立者辯初謂胖王常勝又問其次曰鄧王子阿懶亮謂屬疎安

得立辯曰微公人豈敢當亮曰果不得已捨我其誰旦夕相與
密謀護衛將軍特思疑之以告悼后曰辯等公餘每竊聚語可
疑后以告熙宗怒而名辯問與亮謀何事將如我何杖而遣之
遂謀爲亂使李老僧結興國以爲內應與護衛十人長僕散忽
土阿里出虎合謀覘當夜直興國取符鑰啓門納亮與辯秉德
烏帶徒單貞弁亮妹夫特厮隨辯入宮及殿門衛士覺抽刃劫
之莫敢動直至寢殿遂弑熙宗秉德等奉亮坐羅拜稱萬歲已
未大赦改是年爲天德元年甲子誓太祖廟乙亥追諡皇考宋
高麗夏賀正且使中道遣還二年正月癸巳尊嬪母徒單氏
及母大氏皆爲皇太后名徒單氏宮曰永壽大氏宮永寧乙巳
詔以七事布中外勵官守務農時慎刑罰揚側陋恤窮民節財
用審才實時方臨政每飾情貌以御臣下取軍士屬飯食之幾

盡以敝衾覆衣輒服補綴令記注官見之每出見民車陷泥澤中令衛士下挽俟車出然後行丙午遣侍衛親軍步軍都指揮使完顏思恭等以廢立事報諭宋高麗夏國二月戊申朔封子元壽爲崇王戊辰羣臣上尊號曰法天曆運曆武宣文大明聖孝皇帝詔加兩太后父祖贈官并中外有差三月丙戌宋與二國遣使賀卽位及受尊號四月戊午大殺宗室太宗與宗翰子孫皆絕六月甲子太廟初設四神門及四隅梁思九月甲午立惠妃徒單氏爲皇后十一月戊子以十二事戒約官吏上每與近臣燕語輒引古昔賢君以自況顯貴大臣使進直言十二月癸卯朔却去羣臣所上尊號癸丑詔立太祖射碑于紇石烈部中上及皇后致奠于碑下乙卯有司奏慶雲見巳未罷行臺尚書省改都元帥府爲樞密院以完爲使昂爲副使辛酉刑部尚

書趙資福爲御史大夫諭以多徇情無所彈劾朕甚不取自今
百官凡有不法卽當舉劾無憚權貴 三年正月癸未立春觀
擊土牛丁亥初造燈山于宮中戊子生辰宋及二國遣使來賀
甲午初置國子監乙未上出獵宰相以下辭于近郊上駐馬戒
之曰朕不惜高爵厚祿以任汝等比聞事多留滯汝等苟圖自
安不念民事自今朕將察其勤惰以爲賞罰其各勉之二月丁
巳還宮三月壬辰詔廣燕城建宮室有司圖上營建制度陰陽
五姓所宜詔無拘泥四月丙午遷居之賜役夫帛人一匹丙寅
罷歲貢鷹隼及皇統間苑中所養禽獸沂州男子吳眞犯法當
死憫其母老命有司與養濟著爲令閏月辛未朔而諭右丞張
浩調遷燕京慎無私徇丙子命大官常膳惟進魚肉罷舊貢鵝
鴨等歸德軍節度使阿魯補以撤官舍材木構私第賜死戊戌

詔凡朝官稱疾不治事尚書省令監察御史與太醫同診視不實者坐之七月朱遣使祈請山陵不許十一月癸亥詔罷世襲萬戶官前後賜姓人各復本姓十二月癸酉獵于近郊乙酉還宮四年正月丁酉朔羣臣請立皇太子及定東宮官屬戊戌立捕盜賞格癸亥朔謁世祖太祖太宗德宗陵甲子還宮二月丁卯冊子光英爲皇太子甲戌如燕京戊子次泰州四月丙寅朔從有司請河南北選人並赴中京銓注壬辰上如涼陁五月丁酉獵于立列只山從獵士人各賜一羊乙卯次臨潢府六月甲子朔駐綿山八月癸亥朔獵于途你山甲戌侍御史保魯鞠事不實杖之丙子次于鐸瓦九月甲午次中京十月壬戌朔遣使奉還太廟神主于中京十一月辛丑買珠于烏古廸烈部及蒲與路調其民夫採珠併禁百姓私相貿易十二月甲子斬安

人鼓仙于中京市

貞元元年正月辛卯朔上在中京不視朝詔有司受宋高麗夏
回紇貢獻二月庚申上如燕京三月甲寅親選良家子百三十
餘人充後宮乙卯改元以遷都詔中外改燕京爲中都府曰大
興汴京爲南京中京爲北京四月戊寅皇太后大氏崩五月乙
卯以京城隙地賜朝官及衛士復徵其錢十月丁巳微于良鄉
上嘗過料石岡禱其神曰使吾有天命當得吉卜及是有應封
爲靈應大王戊午還宮壬戌太后園陵未畢從有司請停冬享
及禋祭丙子命內外官聞大功以上喪止給當日假若父母喪
聽給假三日著爲令十一月丙戌朔定州獻嘉禾己丑瑤池殿
成十二月戊午特賜貴妃唐括定哥家奴孫梅進士及第閏月
癸巳定社稷制度癸卯命西京路統 捷愼西北路招討蕭懷
弘簡錄

忠臨黃府總管馬和尚烏古迺烈司招討斜野等北巡二年
正月甲寅朔上建豫不視朝就館賜宋高麗使等宴庚申肅
裕等謀反伏誅三月丙戌幸大興府遣薦含桃于衍慶宮五月
丁卯始置交鈔庫設使副員七月庚申印造鹽鈔香茶文引置
庫使副丙子九月己未常武殿擊鞠縱百姓觀癸亥獵于近郊
丁卯次順州是夜還宮時以頓次需索民間一鵝售用數萬以
一牛易一鵝帝淫嬖不擇骨肉刑殺不問有罪左右有曠職者
或指名呼之寵以顯任常置黃金襦褕間有喜者卽令自取
三年三月乙卯命視大房山雲峯寺爲山陵建行宮于其麓四
月丁丑朔昏霧四塞日無光凡十有七日五月癸丑南京大內
火乙卯命判大宗正事京等如上京奉遷太祖太宗梓宮丙寅
始營山陵六月丙戌登寶昌門觀角抵戲百姓皆無禁乙未命

右丞相思恭太宗正丞胡板魯如上京奉遷德宗梓宮及迎永
壽宮皇太后七月辛酉如大房山乙亥還宮八月甲申啓土賜
役夫人絹一疋甲午遣平章蕭玉迎祭祖宗梓宮於廣寧乙未
增置教坊人數九月戊申遣平章張暉迎祭梓宮于宗州乙卯
上責宰臣及左司泄漏朝廷之事昨授張中孚趙慶襲官除書
未到先已知覺自今尤宜慎密復爾必殺無赦丁卯駕迎梓宮
及皇太后于沙流河庚午射麋以薦梓宮壬申還京十月丙子
皇太后至中都居壽康宮戊寅權奉安太廟神主于延壽寺致
奠梓宮于東郊舉哀己卯梓宮至中都以大安殿爲丕承殿安
置壬午命省部諸司便服治事不奏死刑一月辛卯告于丕承
殿乙未如敢宮丙申冊諡永寧皇太后曰慈憲丁酉大房山行
宮成名曰磐寧十一月乙巳朔梓宮發丕承殿戊申山陵禮成

羣臣稱賀甲寅詔內外大小職官各進一階放免貞元四年租稅賜軍士久戍不替者人絹三疋銀三兩丙辰燕百官於泰和殿丁卯奉安神主于太廟戊辰羣臣再賀辛未獵于近郊十二月己丑還宮雨水乙未上朝太后于壽康宮

正隆元年正月己酉羣臣再上尊號曰聖文神武皇帝上自九月廢朝不出有惡奏名左右司郎中省于卧內庚戌始視朝乙丑觀角抵戲二月癸酉朔改元大赦庚辰御宣華門觀迎諸佛賜寺僧絹五百疋絲五十段銀五百兩辛巳改定內外諸司印記庚子謁山陵辛丑還都三月壬寅朔始定正隆官制并朝叅等格頒行之六月庚辰天水郡公趙桓薨七月己酉命太保昂如上京奉遷始祖以下梓宮八月丁丑如大房山行視山陵十月乙酉葬始祖以下十帝于大房山丁酉還宮閏月己亥朔山

陵禮成羣臣稱賀甲辰回鶻遣使貢木烏籠骨來貢十一月癸巳禁二月八日迎佛二年正月上朝太后于壽康宮二月辛丑初定太廟時享牲牢禮儀癸卯命置局改定親王以下封爵等第追取存者二品以上死者一品告身叅酌削降文書中但有王字者皆立限毀抹墳墓碑志僉發而毀之四月戊戌追降景宣皇帝爲遼王八月癸卯始置登聞檢院詔尚書省凡事理不當者許投狀類奏覽訖付御史臺鞫問甲寅罷上京留守司九月戊子罷護駕軍別置名龍翔虎步出尚書省文資令史以爲外官是秋中都山東河東皆蝗十月壬寅命毀會寧府舊宮殿諸大族第宅及儲慶寺仍平其址而耕種之丁未禁賣古器入他境乙卯初鑄銅錢三年正月宋賀正使孫道夫陛辭上使宣徽使散回驛諭之曰歸白爾帝事我上國多不以誠今畧

舉二事爾民有逃入我境者邊吏皆卽發還我民有叛入爾境者有司匿之往往託辭不發爾又於沿邊盜買鞍馬備戰陣且馬必待人而後可用聞爾國楊太尉其人無能爲雖得馬亦無能用二月壬辰朔初置都城及京兆錢監甲午遣使檢視隨路金銀銅鐵冶三月辛酉朔司天癸日食候之不見命自今遇日食面奏不須頒告六月壬辰蝗入京師七月庚申封子廣陽爲滕王踰二月薨九月辛巳遷中都屯軍一猛安於南京遣吏部尚書李倬等分地安置十一月癸亥詔有司勤政安民乙酉命左丞相張浩叅知政事敬嗣暉營建南京宮室時運一木費至千萬以五百人牽一車宮成飾以黃金五采間之金屑飛空亂如霰雪計一殿已鉅億萬成而復毀務極華麗 四年正月丙辰朔上朝太后于壽康宮庚申更定私相越境法重論死辛酉

置泗州諸權場罷在鳳翔唐鄧穎蔡鞏洮膠四者二月己丑詔
諭宰臣宋國雖臣服有誓約而無誠實不可不備丁未修中都
城又造戰船子通州調諸路猛安謀克軍年二十以上五十以
下者皆籍之雖親老丁多不許留侍三月丙辰朔遣兵部尚書
蒲恭經畫夏國邊界遣使分詣諸道總管府督造兵器材用皆
賦於民箭翎一尺至千錢多椎耕牛以供筋革下至烏鵲狗彘
無不被害八月調諸路馬以戶口爲差計五十六萬餘疋戶自
餵養以俟富室有至六十疋者十月乙亥幸通州觀造戰船遂
獵于近郊丙子賜紇石烈良弼徒單貞佩刀入宮十二月乙卯
宋遣使告母韋氏哀乙丑以左副點檢大懷忠等爲宋弔祭使
乙亥太醫使祈宰上疏諫伐宋殺之五年二月壬子宋遣使
獻遺留物辛未河東陝西地震鎮戎德順軍大風壞廬舍人多

歷死甲戌遣引進使高植刑部郎中海狗分道監視所獲盜賊
並處極刑鋸灼去皮截手足仍戒屯戍千戶謀克等後有獲者
如之三月辛巳東海縣民張旺徐元等反遣都水監徐文步軍
指揮張弘信大興同知李惟忠宿直將軍蕭阿察率舟師九百
浮海討之諭以朕意不在一邑將試舟師耳四月甲寅宿州防
禦使耶律翼使宋失體杖二百除名六月徐文等破賊東海平
並釋其誑誤者七月壬午師還弘信以稱疾迴遛與妓樂飲杖
之二百癸卯遣使發諸路漢軍八月辛亥起榷貨務并印造鈔
引庫悉赴南京辛未謁山陵見田間穫者問其豐耗賜之以衣
九月己卯還宮十月庚午諸路盜起遣護衛完顏普連等二十
四人各授甲士五千督捕山東河東河北中都盜賊十一月丁
亥罷侍衛親軍司以所掌付大興府置左右驍騎都副指揮使

隸點檢司步軍都指揮使隸宣徽院十二月癸丑禁中都河北
山東河南河東京兆軍民網捕禽獸及畜養鷹隼者戊辰以軍
興禁朝官飲酒犯者死、六年正月壬午上將如南京以蕭玉
爲大興尹癸丑宋使徐度等至命叅政李通諭以帝王巡守自
古有之朕昔從梁王軍樂南京風土常欲巡幸今營繕將畢期
以二月末先往河南亦欲校獵淮右隙地從兵不踰萬人祖宗
陵廟在此朕不欲久留汝等歸告爾主宣諭朕意無使淮民輒
懷疑懼庚子詔自中都至河南府所過州縣調從獵騎士二千
隨路所至種麥皆空三月庚申徵諸道兵及諸路水手得三萬
人使運戰船癸亥發中都詔百官先赴南京治事尚書省樞密
院大宗正府勸農司太府少府皆從行吏戶兵刑部四方館都
水監大理司官各留一員丙寅次安肅州三月巳卯改河南北

印山爲太平山稱舊名者以違制論丁亥將至獲嘉有男子上
書言事斬之所言莫得聞又有契丹人自山馳下伏道左自陳
破東海賊有功爲李惟忠所抑立命斬之癸巳次河南府因出
獵幸汝州溫湯視行宮地詔汝州百五十里內州縣並遣商賈
赴溫湯置市禁扈從母輒離次及游賞飲酒犯者皆死又詔內
地諸猛安赴山後牧馬俟秋並發四月丁未以簽書樞密院事
高景山等爲賀宋生日使戊申詔有司移問宋人對境祭額壽
諸州何以剗置堡戍庚戌帝獵汝水有奔鹿突之墮馬嘔血數
日以爲將亡之兆癸未契丹諸部反六月癸卯上如南京壬戌
次近郊左丞相張浩率百官迎謁癸亥上備法駕入于南京至
南薰門大雨入承天門迅雷大風七月巳丑賜隨駕從軍千戶
謀克等錢帛大括天下羸馬殺亡遼耶律氏宋趙氏子男凡百

三十餘人八月壬寅單州賊杜奎據城叛遣都點檢耶律湛石
驍騎副都指揮使大磐討之癸卯北邊有警詔白彥恭紇石烈
志寧完顏穀英唐括孛古的往討契丹時山東賊犯沂州臨沂
令胡撒力戰而死大名府賊王九等據城叛衆至數萬契丹邊
六斤王三輩皆以十數騎張旗幟白晝公行官軍莫敢近所過
州縣開劫府庫物置于市令人攘取之小人皆喜良民不勝其
害太府監高彥福大理正耶律道翰林待制大穎出使還皆言
于朝上惡聞怒而杖之仍除穎名自是人不敢言庚寅上自將
兵伐宋分諸道兵爲神策神威神捷神銳神毅神翼神勇神果
神畧神鋒武勝武定武威武安武捷武平武成武毅武銳武揚
武翼武震威定威信威勝威捷威烈威毅威震威畧威果威勇
三十二總管進自壽春以樞密使昂爲左領軍大都督李通副

之紇石烈良弼爲右領軍大都督判大宗正烏延蒲盧渾副之
徒單眞爲左監軍同判大宗正事徒單永年爲右監軍左宣徽
使許霖爲左都監河南尹蒲察幹論爲右都監召諸將授方畧
賜宴於尚書省諭以太師梁王連年南伐淹延歲月今舉兵必
不如彼遠則百日近止旬月惟爾將士無以征行爲勞戮力一
心以成大功當厚加旌賞其或弛慢刑茲無赦又命工部尚書
蘇保衡爲浙東道水軍都統制副以益都尹鄭家由海道徑趨
臨安太原尹萼爲漢南道行營兵馬都統制濟南尹僕散烏者
副之自蔡州進河中尹徒單合嘉爲西蜀道行營兵馬都統制
平陽尹張中彥副之由鳳翔取散關駐軍以俟後命武勝武平
武捷三軍爲前鋒徒單貞別將兵二萬入淮陰甲午上發南京
詔皇后及太子居守張浩蕭玉敬嗣暉留治省事凡妃嬪皆從

行宮中慟哭久之時軍中將士多亡歸者曷蘇館猛安福壽東京謀克金住等始于大名授甲卽舉部亡歸從者相屬於道衆至萬餘公言我輩今往東京立新天子十月丙午世宗卽位于遼陽數其弑逆大罪凡數十事丁未大軍渡淮至宿州見築垣者殺四方館使張永鈐將至廬州築壘州城之北以居漢南道劉萼取通化軍蔣州信陽軍徒單貞敗宋將王權于盱眙進取揚州前鋒軍至段寨宋戍兵皆遁去敗之于蔚子橋又敗之于巢縣斬二百級權兵千餘夜中來襲射却之興寧人夜焚其積聚遁去詰旦追之宋人逆戰猛安韓棠軍却遂失利溫都與利奔北武捷軍副總管阿散率猛安謀克力戰却之權退保南岸癸亥上次和州百官奉表起居阿散等進階賞賚有差徒單合嘉駐散關宋人攻克秦州臘家城并德順州蘇保衡與敵

戰于海道敗績上遣獲衛謀良虎特离補往東京害世宗行至
遼東卽位詔至撒八執而殺之十一月庚午左司郎中兀不喝
等聞赦入白改元事上拊髀歎曰我本欲滅宋後取一戎衣天
下大定語改元大定豈非天命乎因出其書以示亟命完顏元
宜爲浙西道兵馬都統制刑部尚書郭安國副之上臨江築壇
刑黑白馬祭天被金甲登臺投羊豕江中遣武平總管阿隣武
捷總管阿撒率兵先渡江上置黃紅二旗於岸上以號令紅旗
立則進黃旗仆則止兩舟進逼南岸水淺不得進與宋兵相對
射良久矢盡皆爲所獲上遂還和州將趨揚州過烏江觀項羽
廟嘆曰如此英雄不得天下誠可惜也甲午會舟師于瓜洲期
以明日渡江乙未元宜等軍反帝遇弒年四十在位十三年大
定二年降封爲海陵郡王諡曰煬遷其柩於寧德宮葬大房山

鹿門谷諸王北域中二十年有司奏晉趙王倫廢帝自立惠帝
反正廢爲庶人今煬王罪惡尤過於倫不當仍封爲王近域望
弗詔乃降爲庶人遷之西南四十里

弘簡錄卷二百十五

終

弘簡錄卷二百十六

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金主之五

世宗皇帝本諱烏祿改諱雍太祖孫父宗輔母李氏以天輔七年癸卯三月一日生于上京既長體貌奇偉美鬚髯長過其腹胸間有七子如北斗形性仁孝沉靜明達善騎射國人推爲第一每出獵者老皆隨而觀之皇統間授光祿大夫封葛王爲兵部尚書天德初判會寧牧并太宗正事改中興燕京留守又輔濟南尹貞元初留守西京三年改東京進封趙王正隆二年例降鄭國公進衛公三年再任留守徙曹國公嘗夜有大星流入留守第中六年五月居母喪哀毀過禮一日方寢有紅光照室

及黃龍見居寢上是歲東梁水漲溢高與城等人皆惶駭親出登城舉酒酹之木卽退時契丹撤八反擁謀克括里攻陷韓州據咸平府將犯東京八月起復東京留守會遣婆速路總管完顏謀衍將兵四百討賊王括城中得子弟數百咸願爲兵益造兵仗飾器甲以募李石主留務大謀發兵賊至審州覘者傳言兵十萬且至賊懼遁去還至清河遇故吏六斤南來具言海陵殺母及兄子植奴阿里白樞密使僕散忽土等且言遣人來害宗室兄弟聞之大懼其副留守高存福女在海陵後宮嘗使伺王起居密遣人白海陵造兵甲事李石勸宜早圖遂與推官李彥隆託爲擊毬卽于座上執存福是月復有雲來自西黃龍見雲中十月辛丑逃回萬戶完顏福壽高忠建盧萬家奴等率所領兵二萬來附謀衍亦自長安率兵五千卽以臣禮上謁乙巳

諸軍入城共擊殺存福等丙午慶雲見官屬諸軍勸進因讓良久始從同諸人告太祖廟還御宣政殿卽皇帝位丁未大赦改是歲爲大定元年給復天下三年正陸軍典進錢粟者量授以官由是民出財物佐官用者甚衆己酉饗將士賜官賞各有差自今官吏闕員必不可已者量用新人丁巳出內府金銀器物贍軍吏癸亥詔諭南京張浩甲子興平軍節度使張玄素上謁乙丑遣移剌札八招契丹諸部爲亂者十一月己卯調民間馬充軍用事畢還主死者給價時將幸中都詔都轉運使左淵凡殿位張設悉依舊制毋得擅增并役一夫以擾百姓但謹圍禁嚴出入而已壬午命右司員外郎完顏兀古出詔諭高麗癸未遣權元師左都監吾札忽右都監神土懣廣寧尹僕散渾坦討契丹諸部甲申追尊皇考曰簡肅皇帝皇妣蒲察氏曰欽慈皇

后李氏曰貞懿皇后羣臣上尊號曰仁明聖孝皇帝乙酉追復
東昏王帝號詔中外封子實魯刺許王胡土瓦楚王戊子辭謁
祖廟及貞懿皇后園陵乙丑如中都次小口使留守宗憲先往
壬辰次梁魚務前受命討契丹白彥敬與志寧來上所統軍數
丙申次義州丁酉宋人被陝州防禦使折可立降同知防禦事
李柔立死之十二月乙卯次三河縣完顏敬英來朝詔令規措
南邊及陝西等路事丙辰次通州延安尹唐括德溫來朝丁巳
至中都戊午謁太祖廟己未御貞元殿受羣臣朝庚申以元師
左監軍高忠建等爲報諭宋國使壬戌詔復扈從軍士三年丙
寅同知河間尹高昌福上書上覽之再三詔內外大小職官各
陳便宜二年正月戊辰朔日食詔減御膳及宮中食物之半
語宰相曰汝職進賢退不肖有才能高於已者或懼其分權往

往不肯引置同列朕甚不取卿等毋以此爲心辛未御大和殿宴百官宗戚命婦賜賚有差壬申勅御史臺檢察六部文移有稽滯不當者皆舉劾之甲戌除迎賽神佛禁令乙亥如大房山丙子獻享山陵禮畢有司夙備將出獵左丞相晏等諫曰邊事未寧不宜游幸遂還宮明日諭以朕常慕古之帝王虛心受諫卿等有懷卽言毋緘默以自便辛巳賜扈從萬戶銀百兩猛安五十兩謀克絹十疋甲士絹五匹錢六貫下至阿里喜有差詔中外遣左副點檢蒲察阿孛罕等賞賚河南將士詔前工部尙書蘇保衡太子少保高思廉振賜山東百姓粟帛無妻者具姓名以聞庚寅行納粟補官法壬辰上諭宰執朕卽位未半年可行之事甚多近日全無敷奏朕深居九重正賴卿等贊襄各思所長以聞朕豈有倦息甲午又言卿等當察民間利害及時事

可否以時敷奏不可公餘輒從自便優游而已乙未命放河北
山東陝西等路征南步軍還家其咸平濟州軍三萬入屯京師
二月己亥復起前翰林待制大穎嘉其忠直拜爲祕書丞庚子
詔前戶部尚書梁球郎中耶律道安撫山東百姓招諭盜賊有
因賊與徭役逃避他所者並令歸業罪名輕重並與原免壬寅
張浩來見上初卽位遣遼陽主簿石抹移迭東京麴院都監移
刺葛補招契丹叛人爲白彥敬等所害癸卯並贈鎮國上將軍
食其家各五品俸仍錄其子辛亥定世襲猛安謀克遷授格甲
寅復用進士爲尚書省令史丙辰嵩州刺史石抹术突刺等敗
宋兵於壽安縣閏月甲戌上語宰臣朕樂聞外議於可行者未
嘗不從此者臣民上書多勅尚書省詳閱不卽具奏天下將謂
徒受其言而不行也其亟條具以聞勿有所隱辛卯太和厚德

殿火三月乙巳免南京正隆丁夫貸役錢辛亥以廉平誠諭中外官吏癸亥詔河南陝西山東良民被鹵爲賊者赦正之四月己巳建帝生日爲萬春節乙亥夏國遣使來賀并賀卽位及進方物辛巳宴之于貞元殿上察其像從座廡下者食不精腆怒曰何以服遠人之心杖掌食官各六十癸未夏使朝辭乞互市從之壬辰詔北征將士應契丹與大軍未戰而降者不得殺傷仍安撫之後招誘來降者除奴婢准已鹵爲定外觀屬各還其家仍官爲換贖五月戊戌遣高忠建會北征將帥以討契丹壬寅立楚王允迪爲皇太子六月庚午命僕散忠義經略契丹詔出內府金銀十萬兩以給軍用戊寅詔守禦居庸關古北口石門關罷其征稅惟譏察契丹姦細捕獲者加官賞庚辰宋與高麗遣使賀卽位壬午忠義與窩幹戰于花道大敗之戊子紇石

烈良弼完顏思敬將所部軍同討窩幹七月甲寅詔論契丹八月丁卯永興縣進嘉禾癸酉上語宰臣問者百姓陳言猶有所補卿等位居機要略無獻替徒以聽斷獄訟簿書期會何人不能唐虞之聖猶務舍己從人兼覽博照乃能成治正隆專任獨見故取敗亡朕早夜孜孜冀聞讜論卿等宜體朕意凡百司官吏上書言事爲有司所抑者許進表以聞朕將親覽以觀人材優劣丁丑免齊國妃韓王亨樞密忽土留守頤等家親屬在宮籍者乙酉詔左諫議大夫石琚監察御史馮仲尹廉察河北東路仍詔御史臺卿等所劾惟諸局行移稽滯及緩於赴局者此特細事自三公以下官僚善惡邪正略不審察朕將治卿等罪矣九月甲午朔完顏謀衍擒奚猛安合住乙未詔紇石烈良弼以便宜招撫奚契丹之叛者庚子完顏思敬復契丹窩幹餘衆

悉平思敬獻俘京師甲辰皇太子率百官上表賀乙巳頒詔天下庚戌改葬睿宗皇帝辛酉奉遷梓宮于磐寧宮十月戊辰如山陵謁梓宮哭盡哀癸酉還宮丙子忠義等還軍上謁戊子葬景陵大赦十一月癸巳朔詔僕散忠義等伐宋丁酉第職官廉能污濫不職各爲三等而黜陟之十二月乙酉遣邢部侍郎劉仲淵等廉察宣諭東京北京等路太子少詹事楊伯雄等廉問山西等路官吏能否三年正月壬子遣客省使烏居仁賞勞河南軍士二月庚午上語宰相藥州饑民流散逐食甚可矜恤移於山西富民贍濟仍于道路計口給食丙戌趙景元等以亂言伏誅討平東京僧法通妖術亂衆者三月丙申中都以南八路蝗詔尚書省遣官捕之壬寅詔戶部侍郎魏子平等九人分詣諸路猛安謀克勸農及廉問官吏甲辰詔臨潢漢民逐食於

會寧府濟信等州庚戌免去年租稅四月丁丑詔吏犯贓罪會
赦不叙乙酉賑山西路猛安謀克貧民給六十日糧是月取商
錠環州復宋所侵一十六州五月乙未重五幸廣樂園射柳皇
太子親王百官皆從射勝者賜物有差還御常武殿賜宴擊毬
歲以爲常丙申宋人破靈壁虹縣癸卯河南路都統奚撻不也
叛入于宋毋幹里懶緣坐當死上憫其老特詔原之丙午宋人
攻破宿州辛亥更定出征軍逃亡法癸丑詔諭契丹餘黨四方
甫定民意稍蘇如能自新並釋其罪若執蒲連越父子來者仍
官賞之甲寅紇石烈志寧復取宿州河南副統李术魯定方死
于陣乙卯中都蝗詔叅政完顏守道按問大興府捕蝗官六月
丙子詔正隆末濟州路逃回軍士爲中都官軍所邀殺者官爲
收葬己卯觀稼于近郊八月庚午詔祖宗時有勞効未曾遷賞

者五品以上奏聞六品以下及無職事者尚書省約量升除戊寅詔罷契丹猛安謀克以其戶隸女直乙酉如大房山丁亥薦享于睿陵戊子還宮九月丁酉秋獵丙午詔翰林待制劉仲誨等廉問車駕所經州縣乙卯還宮十月甲子太享于太廟癸酉冬獵十一月壬辰還都戊申詔饋獻樓要求仕者各追一官降除受者具狀奏裁庚戌詔中都平州及饑荒地并經契丹剽掠有質賣妻子者官爲收贖流民未復業增限招誘癸丑罷貢金線段正十二月丁丑臘獵于近郊以所獲鴈山陵歲以爲常四年正月戊子罷諸路府州元日及萬春節貢獻丁酉如安州春水遇大雪詔扈從各舍民家人日支錢一百與其主時獲頭鵝使薦山陵歲以爲常甲辰宋遣審議官胡昉致書來議和好其言失信元帥府拘昉軍中以原書進上覽之曰宋之失信行

人何罪當卽遣還邊事從宜措畫二月丁巳免安州今年賦役
及保塞縣御城邊吳二村凡扈從人嘗止其家亦復一年辛酉
獵于高陽之北庚午還都庚辰北京粟價賜賚免歲課并段
匹一年三月庚子京師地震四月甲戌出宮女二十一人五月
旱癸卯勅有司審冤獄禁宮中音樂放毬場役夫乙巳詔禮部
尚書王競禱雨于北岳己酉命石琚等北郊望祭壬子雨是月
竊幹餘黨蒲速越伏誅六月壬戌紇石烈良弼等還軍以爲平
章政事甲子雨足命有司祭謝嶽鎮海濱于北郊己巳幸東宮
視皇太子疾庚午初定祭五嶽四瀆禮辛未觀稼于近郊庚辰
征南帥府請益伐宋軍萬五千詔以騎三千步四千赴之并陝
西議入蜀利害以聞辛丑大風雷雨拔木八月壬申上復諭宰
臣卿每奏皆常事凡治國安民及朝政不便於民者咸未嘗及

如此則宰相之任誰不能之已卯如大房山辛巳致祭山陵九月癸未朔還都乙酉上諭宰臣勢力之家親識訴訟情囑官吏往往屈法徇情宜一切禁止已丑又言北京懿州臨潢等路嘗經契丹寇掠平薊二州近復蝗旱百姓艱食父母兄弟不能相保多冒鬻爲奴朕甚閔之可速遣使閱實其數出內庫物贖之乙未幸鷹房怒主者以鷹隼置內省堂上痛責其人俾置他所十月癸亥朔獵于密雲縣丙寅還都已卯命泰寧軍節度使張弘信等二十四人分路通檢諸路物力十一月辛卯冬獵戊戌次河間府辛丑尚書省火甲辰次清州閏月壬子朔還都十二月丁亥尚書省奏都統高景山取商州已丑臘獵于近郊是歲天有年斷死罪十有七人五年正月乙卯詔泰州臨瀝接境設邊堡七十駐兵萬三千己未宋通問使魏杞等以國書來稱

姪宋皇帝御名再拜奉書于叔大金聖明仁孝皇帝闕下復書
叔大金皇帝不名不書謹再拜但曰致書于姪宋皇帝不用尊
號不稱闕下以左副都點檢完顏仲爲國信使副以太子詹事
楊伯雄往荅之癸酉罷兵以宋國旗幣悉賞諸軍二月壬寅罷
納粟補官令三月壬申羣臣三請奉上尊號曰應天興祚仁德
聖孝皇帝四月丁未僕散忠義還自軍五月壬子召紇石烈志
寧入見癸酉罷山東路都統以其軍各隸總管府六月甲辰大
安殿柱產芝丙午京師地震雨毛七月戊申朔復震辛未復置
統軍司于京兆徙陝西元帥府河中九月戊申秋獵甲戌還都
十月丁丑朔地震乙未冬獵辛丑還都十一月丙午朔上語宰
臣朕在位日淺未能徧識臣下賢否全賴卿等盡公舉薦今六
品以下殊乏人材何以副朕求賢之意癸丑幸東宮癸亥立諸

路通檢地土等第稅法癸酉大霧晝晦十二月己丑獵于近郊
宋夏高麗各遣使來賀尊號 六年正月庚午勅有司宮中張
設毋以塗金爲飾三月甲寅上如西京庚申次歸化州留守唐
括德溫上謁戊辰入城庚午朝謁祖廟壬申擊毬百姓縱觀四
月甲戌朔詔月朔禁屠宰五月戊申幸華嚴寺觀故遼諸帝銅
像詔主僧謹視之壬子詔給復雲中大同縣及警巡院一年壬
戌將幸銀山賜扈從軍士錢五萬貫有改損苗稼者並償之六
月丙戌發白西京庚子獵于銀山七月辛酉次三义口八月辛
未朔次涼陘庚辰獵于望雲之南山九月辛丑朔還京十月甲
申朝享于太廟詔免雄莫等州今年田租丁酉如安肅州冬獵
十一月丙午還都癸丑以右副都點檢烏古論元忠爲賀宋正
旦使上語宰臣朝官當慎選其人庶可激勵其餘若不當則啓

覲觀之心卿等必知人才優劣舉實才用之十二月甲戌詔有司每月朔望及上七日毋奏刑名甲午泰州民合住謀反伏誅七年正月壬子上服袞冕御大安殿受尊號冊寶禮癸丑大赦五月丙午大興府奏獄空勞以錢三百貫爲宴樂之用六月癸酉罷地衣用龍文者七月戊申禁服用金線其織寶者皆抵罪丙辰己未連幸東宮視皇太子疾閏月丁卯觀稼于近郊甲戌詔遣祕書監移刺子敬經略北邊八月辛亥慶雲環日癸丑監脩國史紇石烈良弼進太宗實錄上立受之己未如大房山壬戌致祭齊陵九月乙丑朔還宮己巳右三部檢法官韓贊以捕蝗受賂除名庚辰地震乙酉秋獵庚寅次保州詔脩注王天祺察訪所經州縣官吏十月乙未朔宣諭諸路朕所幸郡邑曾經宴寢堂宇不須迴避仍舊居止戊申還都上語宰臣海陵不

辨人才優劣惟徇已欲多所升擢朕卽位以來以此爲戒止取
實才用之近聞蠡州同知移刺延壽在官汚濫詢其出身乃正
隆時應房子自今如此局分不得授以臨民職任十一月乙丑
朔上語宰臣近來縣令多非其人其令吏部察其善惡明加黜
陟丁丑歲星躔見十二月戊戌東京留守徒單合喜北京留守
完顏謀衍肇州防禦使蒲察通俱朝辭上諭之曰卿等雖有才
然用心多詐朕左右須忠實人故特命補外賜卿金帶者答其
服勞之久也又顧謂左宣徽使敬嗣暉曰如卿不可謂無才所
欠者純實耳是歲斷死囚二十人 八年正月乙丑上語宰臣
朕治天下方與卿等共之事有不可各當面陳以輔朕之不逮
慎毋阿順取容卿等致位公相正行道揚名之時苟或偷安自
便雖爲今日之幸後世以爲何如羣臣皆稱萬歲辛未又語祕

書監移刺子敬等曰昔唐虞之時未有華飾漢文帝務爲純儉
朕於宮室惟恐過度已詔戶工二部自今宮中之飾勿用黃金
其或興修卽損宮人歲費以充之近亦不復營建矣如宴飲之
事惟太子生日及歲旦上元中秋飲之亦未嘗至醉尤不信佛
法嘗笑梁武帝避道宗以民戶賜寺僧加以三公之官其惑甚
矣庚辰行皇太子冊禮二月甲午朔制子爲改嫁母服三年又
諭敬嗣暉曰凡爲人臣若上欲要君之恩下欲于民之譽必虧
忠節卿宜戒之四月丙午詔曰馬者軍旅所用牛者農耕之資
殺牛有禁馬亦何殊其令禁之五月甲子北望恆大震風雨雹
廣十里長六十里乙丑上如涼陘丁卯歲星晝見庚寅改旺國
崖曰靜寧山曷里澣東川曰金蓮川六月河決李固渡木入曹
州七月甲子制盜羣牧馬者死告者給錢三百貫戊辰上詔平

章政事思敬等曰朕思得賢士寤寐不忘自今朝臣出外卽令體訪外任職官廉能及草萊之士可以助治者具姓名以聞甲戌秋獵已卯次三义口上諭點檢司沿路禾稼甚佳其扈從人少有蹂踐則當汝罪八月乙卯還京九月庚午幸東宮癸酉上諭宰臣卿等舉用人材凡已所知識必使他人舉奏朕甚不喜如其果賢何必以親疎爲避忌也辛巳上語李石口臺憲固在分別邪正然內外百司豈謂無人惟見卿等劾人之罪不聞舉善自今宜令監察御史分路刺舉善惡以聞十月己丑朔詔中外戒諭官吏貪墨乙未命涿州刺史兼提點山陵自明年正月爲始每朔望致祭朔則用素望則用肉丁酉命圖畫功臣於太祖廟其未立碑者立之辛亥詔罷復州歲貢鹿筋十一月乙丑幸東宮十二月戊子朔遣武定軍節度使移刺按等招諭阻鞑

九年正月辛酉上與敬嗣聊移刺子敬論古今事因口亡邊
日屠食羊三百亦豈能盡用徒傷生耳朕雖處至尊每當食常
思貧民饑餒猶在已也彼身爲惡而口祈福何益之有如海陵
以張仲軻爲諫議何以得聞忠言朕與大臣論議一事非正不
言卿等當思人臣之道必以正對庚午詔諸州縣和糴毋得抑
配百姓戊寅契丹外失刺等謀叛伏誅丙戌制漢人渤海兄弟
之妻服闋歸宗以禮續婚者聽二月庚子以中都等路水詔免
稅曹單二州尤甚給復一年甲寅詔女直與諸色人公事相關
只就女直理問三月丁卯尚書省定網捕禽獸法至徒上以重
物輕民非朕之意自今有犯可杖而釋之詔中丞移刺道廉問
山東河南辛未禁民間銷金改作明金等辛巳大名路諸猛安
民戶艱食遣使發廩減價出之四月己丑詔宰臣宜諭百官朕

觀在位之臣初入仕時競求聲譽以取爵位既至顯達卽徇默
苟容爲自安計宜知朕意甚所不取癸巳遣翰林脩撰蒲察元
虎監察御史完顏惕沙分詣河北西路大名河南山東等路勸
猛安謀克務農五月戊辰尚書省奏興造越附二王府應發役
夫上口朕見宮中竹有枯瘁者欲令更植恐勞人而止二王府
各有引從人力又奴婢甚多何得更役百姓爾等但以例爲請
海陵橫役無度可盡爲例耶自今在都浮役久爲例者仍舊餘
並官給傭直重者奏聞六月庚寅冀州張和等反伏誅戊戌以
久旱命宮中毋用扇庚子雨七月乙卯朔罷東北路採珠壬申
觀稼于近郊八月甲申朔有司奏日食以雨不見伐鼓用幣如
常禮九月罷皇太子月料歲給錢五萬貫上語臺臣比間朝官
內有覘中官物以規貨利者汝何不言皆對曰不知上曰朕尚

知之汝有不知者乎朕若舉行汝將安用壬戌秋獵十月丁亥
還都丙午大享于太廟以鹿伐牛著爲令十一月庚申上幸東
宮壬戌冬獵丙子還都十二月丙戌詔賑臨濟秦州山東東路
河北東路諸猛安民辛丑獵于近郊丙午制職官犯公罪在官
已承伏者雖去官猶論十年正月甲子命宮中元宵無得張
燈二月甲午安化軍節度使徒單子溫副使老君奴以賊罪伏
誅戊申上語近臣曰護衛以後皆是治民之官其令各教讀書
三月丙辰因選護衛中善射者押賜宋使射弓宴宋使射中五
十押宴纔中其七上語左右將軍曰護衛十年出爲五品職官
每三日上直其役亦輕矣豈徒令飽食安臥而已弓矢不習將
焉用之五月乙卯如柳河川閏月庚辰夏國任得敬劄其主李
仁孝使上表中分其國宰臣李石等以爲事繫彼國不如許之

上謂彼劫於權臣耳詔不許并却其貢物七月壬午秋獵放圍
場役夫扈從糧食竝從官給敢有縱畜牧蹂踐禾稼者杖之仍
償其直八月己未起京十月甲寅如霸州冬獵乙丑上語大臣
比因巡獵闕固安縣令高昌裔不職已令罷之霸州司候成奉
先共職謹恪可進一階除固安令辛未上語宰臣朕凡論事有
未能深究其利害者卿等宜悉心論列無爲面從而退有後言
十一月辛巳制盜太廟物者與盜宮中物論同甲申上幸東宮
癸巳夏國誅任得敬遣使來謝詔慰諭之十二月丙寅上語宰
臣比體中不佳有妨朝事今觀所奏事皆依條格殊無一利國
之事若一朝行一事歲計有餘則其利博矣朕居深宮豈能悉
知外事卿等尤當注意 十一年正月壬午詔職官年七十以
上致仕者不拘官品竝給俸祿之半丙申命賑南京屯田猛安

被水災者戊戌尚書省奏汾陽軍節度副使牛信昌生日受饋
獻法當奪官上曰朝廷行事苟不自正何以正天下在京宰執
樞密生日節辰饋獻不少此而不問小官饋獻卽加按劾豈正
天下之道自今悉宜罷去又語宰臣往歲清暑山西近路禾稼
甚廣殆無畜牧之地因移於五里外今聞民皆去之他所甚可
矜憫其令依舊耕種事有類此卿等宜卽告朕無忽四月丁未
歸德府民臧安兒謀反伏誅大理卿李昌圖廉問臬定尹徒單
貞成平尹石抹阿受賊不法不卽黜罷杖之癸亥高麗國王弟
皓廢主覲自立詐稱讓國遣使以表來上五月辛卯詔遣吏部
侍郎靖使高麗問故六月己酉詔朕居深宮勞民之事豈能盡
知諸路常貢數內同州沙苑羊非悉用徒勞民爾罷之自今似
此當具以聞戊午觀稼于近郊八月癸卯朔詔朝臣朕嘗諭汝

等國家利便治體遺闕皆可直言外路官民亦嘗言事汝等終
無一語凡政事所行豈能皆當自今直言得失毋有所隱乙巳
上語宰臣隨朝之官自謂歷一考則當得某職兩考則當得某
職第務因循碌碌而已賞罰不明豈能勸勉自今外路官與內
除者察其公勤則升用之但苟簡於事不須任滿便以本品出
之庚戌又詔應因竊幹被掠女直及諸色人未經刷放者官爲
贖放隱匿者以違制論其年幼不能稱說住貫者從便住坐又
語宰臣五品以下闕員甚多朕不能知難於得人三品以上朕
則知之卿等曾無一言見舉者欲盡久安之計與百姓之利而
無良輔佐所行皆尋常事耳雖日日視朝何益之有卿等宜勉
思之九月癸未獵於橫山庚寅還都十月甲寅上語宰臣朕已
行之事卿等以爲成命不可復更但承順而已一無執奏且卿

等凡奏何嘗不從自今朕旨雖出宜審而行有未便者卽奏改之或有在下位言尙書省所行未便亦當就改毋拒而不從丙寅紇石烈良弼等進睿宗實錄十一月戊寅幸東宮上語皇太子曰吾兒在儲貳之位朕爲汝措天下無復有經營之事汝惟無忘祖宗純厚之風以勤脩道德爲孝明信賞罰爲治而已若如遼海濱王嫉國人愛其子而殺之此何理也子爲衆愛愈爲美事所爲若此安有不亡若太宗有道之君伐高麗不終命高宗繼之如此之事朕不汝遺又命以事出李勣我死授以僕射彼必能致死力于汝夫人臣受恩於父安有怠報於子朕御臣下惟以誠實耳羣臣皆稱萬歲丙戌朝享于太廟丁亥有事于圓丘大赦癸巳羣臣奉上尊號曰應天興祚欽文廣武仁德聖孝皇帝十二月癸卯冬獵乙卯還宮十二年正月戊寅詔有

司凡陳言文字皆國政利害自今言有可行以其本封送祕書
監當行者錄副付所司丙申以水旱免中都西京南京河北河
東山西陝西去年租稅二月壬寅上召諸王府長史諭之曰朕
選汝等正欲勸導諸王使之爲善如諸王所爲有所未善當力
陳之尙或不從則具某日行某事以奏若阿意不言朕惟汝罪
丙午尙書省奏暗察明訪清强官城陽軍同知山和尙等皆著
政聲速議陞除進官旌賞庚戌如順州春水癸丑還都丙辰詔
自今官長不法其僚佐不能糾正又不言上者重坐之三月乙
亥詔尙書省賊汗之官已被廉問若仍舊職必復害民其遣使
諸道卽日罷之丁丑詔遣宿直將軍烏古論思列冊封王皓爲
高麗國王庚寅雨土癸巳回紇遣使來貢丁酉北京曹貴等謀
反伏誅四川旱命禱祠山川丁巳西北路納合七斤等謀反伏

誅癸亥詔宰臣諸府少尹多闕員當選進士雖資叙未至而有政聲者擢用之丁卯阻糴來貢五月癸酉如百花川甲戌命賑山東東路胡刺溫猛安民饑丁丑次阻居久旱而雨戊寅觀稼戒扈從蹂踐民田禁百官及承應人不得服純黃油衣癸未諭宰臣朕每次舍凡秣馬之具皆假於民間多亡失不還其主此彈壓官不職可擇人代之所過卽令詢問但有亡失並與償直乙酉詔給西北路人戶牛六月甲寅如金蓮川九月丙子還京丁亥太白晝見在口前鄜州李方等謀反伏誅十月高麗國王王皓遣使謝封冊十一月丙子上深責曹國公主家奴犯事宛平令劉彥弼杖之主乃折辱令此可見臺臣徇勢畏忌命各奪俸一月丁丑因御史大夫璋奏太祖武元皇帝受天明命太宗皇帝奄定宋土自古帝王之興必稱受命當製大金受命之寶

以明示萬世上曰卿言正合朕意乃遣使夏國市玉壬午同州
民屈立等謀反伏誅戊子上諭宰臣令語記注官凡朕之言動
及與卿等所議皆當與知其於善惡無或有隱故此紀錄詳悉
十二月丁酉詔遣官分路選年二十以上四十以下有門地才
行及善射者充護衛不得過百人戊戌冀州王瓊等謀反伏誅
辛丑出宮女二十餘人辛亥禁衛錄官以宴飲廢公務壬子詔
金銀坑冶聽民開採毋得收稅癸丑獵于近郊己未詔自今除
名人子孫有在任者並取奏裁十三年正月癸酉尚書省奏
南客車俊等因樵場貿易誤犯邊界罪當死上曰本非故意徐
令放還恐彼國復治其罪毋令知之甲戌詔有司嚴禁州縣坊
里爲民害者聞月辛酉洛陽縣賊聚衆攻盧氏縣殺縣令李庭
才亡入于宋三月乙卯上語宰臣會寧乃國家興王之地自海

陵遷都永安寢忘舊風朕時嘗見女直風俗迄今不忘今之燕
飲音樂皆習漢風蓋以備禮本非朕心所好東宮不知女直風
俗第以朕故猶尚存之恐異時一變此風非長久之計甚欲一
至會寧使子孫得見舊俗庶幾習效之乙亥上御睿思殿命歌
女直詞顧謂皇太子及諸王曰朕思先朝所行之事未嘗暫忘
故時聽此詞亦欲令汝輩知之漢人風俗不如女直純實至於
文字語言或不通曉是忘本也自今當體朕意至於子孫亦當
遵朕教誡五月戊戌禁女直人毋得譯爲漢姓又命應衛士有
不聞女直語者並勒習學仍自後不得漢語甲辰尚書省奏鄧
州民范三毆殺人當死而親老無侍上曰在醜不爭謂之孝孝
然後能養親若以一朝之忿忘其身寧能事親乎可論如法其
親官與養濟七月庚子復以會寧府爲上京庚戌罷歲課雉尾

八月丁卯詔賜諸猛安謀克廉能三等官賞丁亥秋獵九月辛亥還都壬子大名府僧李智究等謀反伏誅十月乙丑歲星晝見十一月壬子吏部尚書梁肅請禁奴婢服羅綺上曰行之當有漸始朕宮中服御常自節約舊服明金者已減大半近聞民間風俗比正隆時稍覺淳儉卿等當更務從儉素使民知所效也十四年二月丙寅命刑部尚書梁肅等爲宋詳問使戊寅詔免去年被水旱百姓租稅三月甲午上語大臣海陵純尚吏事當時宰執止以案牘爲功卿等當思經濟之術不可狃于故常也又徧諭猛克之民今後不許殺生祈祭凡宴會必遇節辰及祭天畢方許自二月一日至八月終恐妨農功竝禁飲燕亦不許赴會他所雖閒月有犯痛飲者抵罪四月乙丑上諭宰臣祈福建寺雖已條禁尚多犯者宜申約束無令徒費財用戊辰

有事于太廟以皇太子攝行事五月丙戌朔詳問使梁肅等還
甲午如金蓮川八月丁巳次乂里舌日中白龍見御帳東小港
中須臾乘雲雷而去癸亥獵于彌離補九月丁亥還都癸卯上
退朝詔侍臣曰朕自潛邸踐阼以至于今於親屬舊知未嘗輒
有所徇近御史臺奏樞密使永中嘗致書河南統軍使完顏仲
託以賣馬朕知而不問自意欺此一事夙夜思之甚如有疾已
酉宋遣使報聘十月乙卯朔詔圖畫功臣衍慶宮聖武殿之左
右廡有司奏惟五人有諡餘十五人令考檢功狀擬定諡號以
進從之十一月戊戌召尚食局使諭之曰大官之食皆民脂膏
日者品味太多不可徧舉徒爲虛費自今止進可口者數品而
已十五年七月丙午粘拔恩與所部康里孛古等內附九月
戊子至自金蓮川辛卯高麗西京留守趙位寵叛其君請舉慈

悲憤以西鴨綠江以東四十餘城內附不納丙申幸新宮閏月
巳酉朔定應禁弓箭槍刀許路分品官家奴客旅等帶弓箭辛
亥上語左丞相良弼曰今之在官者須職位稱愜所望然後始
加勉力其或稍不如意則止以度日爲務此豈忠臣之道丁巳
又言在昔海陵時丞相秉德等皆有能名然爲政不務遠圖止
以苛刻爲事一月之間杖殺二十餘人罪皆不至於死海陵爲
人如虎此輩尚欲以術數要之以至賣直取死得爲能乎辛酉
高麗國王奏告趙位寵伏誅并謝不納詔慰答之壬戌詔親王
百官僚人所服紅紫改爲黑紫甲戌詔年老之人毋注縣今年
老而任從政其佐亦擇壯者參用十月乙未冬獵丁未還都十
一月乙卯上幸東宮初唐古部族節度使移刺毛得之子殺其
妻而逃上命捕之皇姑梁國公主請赦宥上語宰臣公主婦人

不識典法罪尚可恕毛得請託至此豈可貸宥不許 十六年
正月甲寅詔免去歲被水旱路分租稅甲子詔宗屬未附玉牒
者並與編次丙寅上與親王宰執從官從容論古今興廢事曰
經籍之興其來久矣垂教後世無不盡善今之學者多能誦之
而不能行者多矣苟不能行誦之何益女直舊風雖不知書然
其祭天地敬親戚尊者老接賓客信朋友禮意欵曲皆出自然
與古書所載無異汝輩當習學之不可忘其舊風戊辰宮中火
庚午上按鷹高橋見道側醉人墮驢而臥命左右扶而乘之送
至其家辛未皇姑邀上至私第諸妃皆從宴飲甚歡公主每進
酒上立飲之三月丙午朔日食改賀萬春節用明日戊申臨潢
雨豆戊午上御廣仁殿皇太子親王皆侍膳上從容訓之曰大
凡資用當務節省如其有餘可周親戚勿爲妄費因舉所御服

此已三年未嘗更換尚爾完好汝等宜識之壬申復置吾都稅部禿里許其部長體土胡魯雅里密斯入獻四月丙戌詔京府設學養士及定宗室宰相子程試等第戊子制商賈舟車不得用馬壬寅如金蓮川五月戊申南京宮殿火留守轉運司皆抵罪庚申旱遣使禱雨靜寧山神有頊而雨六月山東兩路蝗七月壬子夏津縣令移刺山住坐贓伏誅八月辛巳次霹靂濼九月乙巳還宮己酉諭左丞相良弼曰西邊自來不備儲蓄其令所在和糴以爲緩急之備癸丑又諭之曰海陵非理殺戮臣下甚可哀憫其字諭出等遺骸令逐處訪求官爲收葬十月丙申詔諭宰執諸王小字未嘗更以女直語卿等擇名以上十一月壬寅朔尙書省奏河北東路胡刺溫猛安所轄孛術魯舍所以謀克讓其兄子蒲刺列上賢而從之仍議加恩賞十二月壬申

朔詔諸科出身人四十年方注縣今年歲太遠今後仕及三十
二年別無贓犯追奪使與縣令丙子詔諸流移人老病者官與
養濟已卯上諭宰臣朕以萬幾之繁豈無一失凡已經奏斷事
有未當卿等但言之朕當更改必無吝也庚寅定榷場香茶罪
賞法 十七年正月丙午有司奏高麗所進玉帶未真當却之
上曰小國無能辨識誤以爲玉若復却之豈禮體耶不聽戊申
詔於衍慶宮聖武殿西建世祖神御殿東建太宗睿宗神御殿
已酉詔西北路招討司契丹民戶其嘗叛者已行措置其不叛
及放良奴隸可徙烏古里石壘部令及春耕作庚戌詔吏部考
功郎詳考諸大臣勞績其應賜功臣號者卽以聞不許令子孫
自陳壬子上詔宰臣親親報功先王之令則朕念宗室中其先
有功於國今年高者往往未有官稱欲稍加以官乃詔行之壬

戊詔海陵時大臣無辜被戮家屬籍沒者並釋爲良宋天水郡王被害子孫親屬所寄骨殖官爲葬於本處遼豫王親屬水入本塾者亦遷祔之三月辛亥詔免去年河北山東陝西河東西京遼東等十路被旱蝗租稅又詔尚書省賑東京婆速曷速館三路回奏三路之粟不能周給上曰自古帝王皆以蓄積爲國家長計朕嘗語卿等遇豐年卽廣糴以備凶歉皆言倉廩盈溢至欲賑濟乃云不給朕將積以獨用耶今可於隣道取濟自後預備歲以爲常四月戊寅諭宰臣郡縣之官雖以罪解一二歲後亦須再用猛安謀克皆創業勤勞有功之人其世襲之官不宜以小罪奪免雖年未及六十欲令子孫承襲者聽五月尚書省奏皇家袒免以上親燕饗班次並從唐制癸卯幸姚村旋賜七品以下官及宗室子諸局承應人射柳賞罰有差六月己卯

語宰臣朕年老恐因一時喜怒處置有所不當卿等卽當執奏
毋爲面從成朕之失七月大雨河決上雖退朝留心政事嘗責
大臣於國家事未嘗用心一日問尚書省歲賜西北路戍兵羊
三萬如何運致宰臣不能對八月己巳觀稼于近郊庚辰上語
宰臣今在下僚豈無人材但在上者忌或勝己不爲汲引至於
阿徭所見事雖當理亦以爲非己意從之則人謂政非己出如
此者多朕甚惡之近觀大理寺所斷雖制有正條理不能行者
別具情見朕惟取其所長夫爲人之理他人之善者從之則可
謂善矣丙戌上語中丞紇石烈邈御史之職在於體察糾問吏
治能否務去其擾民且冀得賢今如所差東北路監察輒受訟
牒聽其妄告使爲政者如何則可大不稱職命杖之五十九月
戊申秋獵甲子還都十月己巳夏國進百頭帳詔却之境上後

因邊臣懇求進入乃許之癸酉詔以羊十萬付烏古里石疊蓄
牧收其滋息以予貧民辛巳上語宰臣昔狄仁傑起自下僚力
扶唐祚使旣危而安延數百年之永雖以其賢若非婁師德何
以自薦今在位乃不聞薦賢何也癸未又言古之諫者不惟有
補於國亦以顯名終身今觀上封章者殊無大利害不過爲利
而已昔海陵南伐祁辛以一醫士極諫至戮於市此本朝以來
一人而已惟有監察御史田忠孺所言不私今當升擢以勵其
餘十二月戊辰禁渤海舊俗婚娶多不以禮必先攘竊自今犯
者以姦論壬申上語宰執朕觀宗室中鮮有及朕之壽者今年
五十有五若踰六十必倦於政事恐不能有所爲宜及朕之康
強凡女直猛安謀克及國家政事未完法令未一者宜皆脩舉
凡所施行朕不爲息

十八年正月壬戌如春水二月丙寅朔

次管壯丙子次華港己丑還宮三月丁未上語宰執縣令之職
最爲親民當得賢材用之朕巡幸所至必令體訪官吏臧否比
見石城玉田兩縣令皆年老苟祿而已惟玉田主簿石抹沓乃
能吏可授本縣令與石琯所奏良鄉令焦旭慶都令李伯達皆
擢用之己酉獻州人殷小二等謀反伏誅五月丙午如金蓮川
閏六月辛丑命賑西南西北兩招討司民及烏古里石墨部轉
戶饑七月丙子上語宰臣職官始犯賊罪容有過誤至于再犯
是無改過之心自今不論多寡並除名八月乙巳還京十月庚
寅朔陝州防禦使石抹斡家奴賊罪除名十一月丙子尚書省
奏崇信縣令石安節買車材於部民三日不償其直當削官一
階解職上因言朝廷之政太寬則人不知懼太猛則小玷亦將
不免今後但當取其貪污與清白之尤者數人黜陟之則人自

及廉能者則升用之以勵其餘若昔年岐國但一言合意便升用之一言之失便責罰之安能知人賢否朕則不然衆所與者用之不以獨見爲是也己亥河決衛州辛丑獵于近郊二十一年正月壬子夏國請復綏德軍權場仍許就館市易上問山東大名等路民驕縱奢侈不事耕稼詔遣閹實計口授地必令自耕地有餘而力不瞻者方許招人租佃仍禁農時飲酒二月乙巳元妃李氏喪將致祭興德宮有司請由薊門上恐妨市民生業特從他道仍詔街衢不必毀撤門肆簾箔三月丁未朔幸長春宮聞薊平樂等州民乏食命有司發粟以糶貸其貧不能者有司恐貧民不能償止貸有戶籍者以監察御史石抹元禮鄭達卿不糾舉各笞四十漁陽令夾谷移里罕司候判官劉居漸各削三官通州刺史郭邦傑奪俸更遣人閱實賑貸乙丑遼

州民宋忠恩州民鄭明等各亂言伏誅丁卯上誥宰臣近聞宗
州節度使阿思憑行事多不法監察未嘗舉劾郡牧副使僕散
那也取部人二穆杖至爲細事乃便劾奏難謂稱職自今監察
職事脩舉者與遷擢不稱者大則降罰小則決責不去其官二
月乙未上誥宰臣朕觀自古人君多進用讒諂其間蒙蔽爲害
非細若漢明帝尚未免此戒朕雖不及古之明君惟近習讒言
未嘗入耳至於宰臣亦未嘗私議偏用一人四月戊申增築泰
州臨潢府等路邊堡及屋宇庚戌親祀衍慶宮奉安昭祖以下
三祖三宗御容壬申幸壽安宮七月丙戌還都二十二年三
月丁丑命尚書省申勅西北路招討司勒猛安謀克官督部人
習武備甲申諭戶部今歲行幸山後所須並不得取之民間雖
所用人夫並以官錢和雇違者杖八十罷職癸巳詔前所重脩

制條頒行之四月乙卯行監臨院務官食直法戊午從皇太子
請削明肅尊號詔中外甲子如金蓮川六月庚子朔制立放良
人奴隸內娶良人爲妻所生男女卽爲良民七月辛巳帝微覺
有愆宰臣奏事請退止曰豈以朕之畧爽於和而倦臨朝之大
政耶面使終其奏甲午秋獵九月戊寅還京己丑以東京留守
同知裔在任專恣失上下之分謫授復州刺史乙未壽州刺史
訛里也同知查剌軍事判官孫紹先推場副使韓仲英等以受
商賂縱禁物出界皆處死十月辛丑徙河間宗室于平州庚戌
祿享于太廟十一月甲申玉曰縣令移刺查坐贓伏誅戊子冬
獵十二月庚子還都癸丑獵于近郊辛酉立強取諸部羊馬法
二十三年正月庚午詔有司但獲強盜迹狀旣明賞隨給之
勿得更待辛巳廣樂園燈山火壬午如春水詔夾道三十里內

被役之民與免今年租稅仍給傭直甲午大邦基伏誅三月乙巳還都庚戌上覽御史臺進所察州縣官罪謂皆細碎事務又止錄其惡而不舉其善尤爲官者所難其併察善惡以聞三月丙子初製宣命之寶金玉各一庚辰潞州涉縣人陳圓亂言伏未乙酉雨土四月癸丑地生白毛壬戌幸壽安宮勅有司爲民禳旱是夕雨五月庚午罷縣令不任職大難訛只等十人仍進六十以上者官兩階六十以下官一階並給半俸甲戌命應部除官嘗以罪罷而再叙者遣使按其治迹如有善狀方許授以縣令若無治狀不以任數多少並不得授丁亥雷雹六月壬子上在宮中苦暑通宵不寐因念小民比屋卑隘何以安處八月乙未觀稼于東郊命發女直字孝經千部付點檢司分賜獲衛親軍癸卯還都乙巳大名府猛安人馬和尚謀叛伏誅九月巳

已譯經所進譯過易書論語孟子老子楊子文中子劉子及新
唐書命頒行之因語諸王宰執朕所以令譯五經者正欲女直
人知仁義道德所在耳辛未秋獵十月癸巳還都庚戌幸東宮
賜皇孫吾都補洗兒禮己未慶雲見閏十一月甲午上語宰臣
朕常思帝王之政固以寬慈爲德惟賞罰不濫卽可矣不可如
梁武帝專務寬慈以至綱紀大壞汝等宜以爲戒戊午歲星贊
見己未上語宰臣女直進士可依漢兒進士補省令史夫儒者
操行清潔非禮不行以吏出身自幼習其食墨至於爲官不能
遷改政道興廢實由於此庚申尙書省奏事上顧左司員外郎
徐偉斯人純而幹右司郎中郭邦傑直而頗躁十二月癸酉上
語宰臣海陵自以不道恐上京宗室起而圖之故不問疎近並
徙之南豈不知漢光武宋康王及繼大統乎過慮若此何其謬

也乙酉高麗來告母喪二十四年正月辛卯朔徐州進芝草
十有八莖真定進稼禾二本六莖異畝同穎戊戌如長春宮春
水二月壬申遷都丙戌以東上關門使完顏進兒等爲高麗勅
祭使西上關門使大仲尹爲慰問使虞王府長史永明爲起復
使三月甲午上將如上京尚書省進皇太子守國諸儀丁酉辭
陵壬寅駕興宰執以下奉辭于通州上語之曰卿輩皆故老宜
悉心輔太子守國以副朕意又語樞密徒單克寧曰朕巡省之
後脫有事卿必親之母忽細微大難圖也又顧六部官曰朕聞
省部文字多以小不合而駁之苟求自便致累歲不能結絕朕
甚惡之自今可行則行可罷則罷毋使在下有帶留之歎四月
庚申次廣寧府丙寅次東京丁卯朝謁孝寧宮給復東京百里
內夏秋稅租一年在城隨闕年七十者補一官徒罪以下蠲之

乙酉觀漁于混同江五月己丑至上京居于光興宮庚寅朝謁于慶元宮戊戌端午宴鄉老宗父子皇武殿語之曰朕思故鄉積有日矣今旣至此可極歡飲賜諸王妃主宰執百官命婦各有差宗戚皆霑醉起舞竟日乃罷六月辛酉幸按出虎水臨漪亭壬戌閱馬于綠野淀七月己未上語宰臣天子巡狩當舉善罰惡凡士民之孝弟嫺睦者舉而用之其不顧廉耻無行之人則教戒之不悛者加以懲罰丙午獵于勃野淀乙卯又言今時之人有罪不問旣過之後不知有罪必責反謂每事尋罪風俗偷薄如此不以文德感之安能復古卿等以德輔佐當使復還古風八月乙亥詔免上京今年市稅九月甲辰歲星晝見十月丁卯獵于近郊十一月甲午詔有司報諭宋與高麗夏國上京天寒地遠正旦生日不須遣使丙午尚書省奏徙速頻胡里改

三猛安二十四謀克以賀上京十二月丙辰獵于近郊 二十
五年正月乙酉朔受朝丁亥宴妃嬪親王公主文武從官于光
德殿宗室宗婦及五品以上命婦與坐者千七百餘人賞賚有
差二月癸酉以東平尹烏古論思列怨望殺之丁丑如春水四
月己未還宮癸亥幸皇武殿擊毬許士民縱觀甲子詔遐速頻
胡里改兩路三十謀克爲三猛安移置率督畔竊之地以實上
京壬申曲赦會寧府免今年租稅百姓年七十以上者補一官
甲戌以會寧府官一人兼太宗正丞以治宗室之政上語羣臣
朕樂上京風物每奏慰都輒用威愴祖宗舊邦不忍捨去萬歲
之後當置朕於太祖之側卿等無忘朕言丁丑宴宗室宗婦于
皇武殿大功親賜官三階小功二階總麻一階年高屬近者加
宣武將軍及封宗女賜銀絹各有差曰朕尋常不飲酒今日甚

欲成醉此樂不易得也因各以次起舞上曰吾來數月未有一人歌木曲者吾爲汝等歌之命宗室子弟叙坐殿下者皆坐殿上聽上自歌其詞道王業之艱難及繼述之不易至慨想祖宗宛然如睹慷慨悲激不能成聲歌畢泣下右丞相元忠率羣臣宗戚捧觴上壽皆稱萬歲於是諸夫人更歌木曲如私家之會既醉上復續調至一鼓乃罷己卯駕還庚辰宗室戚屬奉辭上曰朕久思故鄉甚欲留一二歲京師天下根本不能久于此也太平歲久國無征徭汝等皆奢縱往往貧乏朕甚憐之當務儉約無忘祖先艱難因泣數行下宗室戚屬皆感泣而退五月庚寅平章政事襄奉御平山等射懷孕兔上怒杖平山三十名襄誠傷之乃下詔豺未祭獸及諸胎孕不許採捕冬月雪尺以上不許用網違者罪之壬寅次天平山好水川癸卯遣使臨潢泰

州勸農六月甲寅獵近山見田垅不治命筇田耆與申皇太子
允恭薨七月戊申發好水川九月辛巳朔次轄沙河賜百歲老
姬帛甲申次進水名見百二十歲女直老人能道太祖開創時
事上嘉歎賜食與帛己酉還京臨奠宣孝皇太子于熙春園十
月丙辰上語宰臣護衛年老始出臨民手字尚不濫誓何以治
民天子以兆民爲子不能家家而撫在用人而已知其不能而
強授之百姓其謂我何今親軍數多宜稍減損詔定額爲三千
宰臣退上語左右憫其年老艱于久立可置小榻廊下使少休
息丁丑命學士院諫院祕書監司天臺著作局閣門通進拱衛
直武器署等官凡直宮中午前許退十一月丙申夏國遣使問
起居十二月甲戌制增留守統軍總管招討都轉運府尹轉運
節度使月俸二十六年正月甲辰如長春宮春水二月癸酉

還都上特懇於人才遇大理卿闕用右丞粘割幹特刺言前吏部尚書唐括貢可乃授之因語之曰朕每季求仕人間以疑難令剖決之其才識可取者仍訪察政迹如其言行相副卽加陞用三月己丑尚書省擬除授上又曰卿等在省未嘗薦士止限資級安能得人如齊桓公本中庸主得一管仲遂成霸業古亦有布衣入相者聞宋亦多用山東河南流寓疏遠之人皆不拘於貴近朕夙夜以思難得徧知如必俟全才而後進益亦難矣古來宰相率不過三五年而退罕有三二十年者外官三品以上語幹能固不易亦必有德行最優之人但無故得進耳癸巳香山寺成駕臨幸賜名大永安給田二千畝粟七千株錢二萬貫丁酉以親軍完顏乞奴言制猛安謀克皆先讀女直字經史然後承襲因言但令稍通古今則不肯爲非乞奴一僦人乃能

言此審其有益何憚而不從四月壬子尚書省奏定院務監官
虧兌陪納法及橫班格因曰朕想前代之君勿失師保之訓及
其卽位多不知稼穡艱難如遼主聞民間乏食謂何不食乾腊
其失天下蓋由此朕嘗歷外任稔知下情故常日御膳每從減
省嘗有一公主至無餘膳可與當直官目睹而奏朕却以雖日
用五十羊亦不難然皆民之脂膏不忍爲也監臨官惟知利已
不知其利自何而來其情可惡昔隋煬帝時楊素專權行事乃
不慎委任之過也丙子尚書省奏中都路都轉運同知趙職瑞
在職應錢穀利害文字多不題署降授石州刺史上曰比有上
書言職官犯者不可復用朕謂此言極當如軍期急速權可使
用今天下無事復用此輩何以戒將來特命除名六月癸亥尚
書省奏速頻胡里改世襲謀克事上曰其人皆勇悍背世祖與

之隣苦戰累年僅能克復其後乍服乍叛至穆康時始服聲教
近世亦嘗分徙朕欲稍遷其民上京實國家長久之計也上以
時相多姑息女直人語曰朕意未嘗不知優恤然涉於賊罪雖
朕子弟亦不能恕必痛繩之八月戊寅河決衛州命戶部侍郎
王寂都水少監王汝嘉徙衛州胙城縣丁亥尚書省奏遣吏部
侍郎李晏等二十六人分路推排諸路物力上因語宰臣北閭
河水泛溢民罹其害貨產皆空今何復遣張汝霖對曰今推排
皆非被災之處上曰雖然必隣道也旣隣于水豈無驚擾遷避
者何獨貨產尚有餘哉甲午秋獵九月壬子次薊州辛丑幸仙
洞寺壬寅幸香林淨名二寺九月甲辰朔幸盤山上方寺因徧
歷中盤天香感化諸寺庚申還都十月庚寅上語宰相朕聞宋
軍自來教習不輟我軍專務遊惰如西南西北兩路招討司地

隘人戶無處罔獵不能閑習騎射委各猛安謀克官依時教練
勿謂天下旣安而無豫防之心一旦有警軍不可用豈不敗事
其令以時訓練有弛慢過期及不親監視並決罰之十一月甲
辰朔上語宰臣女直中人材傑出者少若起身刀筆雖有力可
用其廉介之節終不能及進士今有至老不能得五品者況欲
至卿相乎如脩注崇璧斯人孱弱付之以事未必能辦以其謹
厚長者故置諸左右欲諸官效其爲人也戊午以左警巡副使
鶻沙通敏善斷擢殿中侍御史兼右三部司正庚申立原王璟
爲皇太孫因誡之曰唐太子承乾所爲多非度太宗縱而弗檢
遂至於廢如早爲禁止當不至是朕今年老尚聞善不厭每讀
史傳見善人不忘忠孝檢身廉潔未嘗不爲興起孔子云見善
如不及見不善如探湯大哉言乎汝勉之哉復語之曰平時用

人宜尚平直至於軍職當用權謀使人不易測可以集事唐太宗自少年能用兵後雖居帝位猶不能改吮瘡剪鬚皆權謀也十二月甲申上退朝御香閣左諫議黃久約使宋還面奏道經宿泗見貢新枇杷者州縣調民急遽上諭之曰有司奉土惟沽辦事之名不問利害如何朕嘗欲得新荔枝兵部遂於道路特設舖遞若非卿言朕豈知之夫爲人無識一旦臨事便至顛沛宮中事無大小朕所以常親覽因不得人故也如使得人寧復他慮亟命罷之丁亥又語宰臣朕年來惟以省約爲務常膳止四五味已厭飫之比初卽位十減七八宰臣對以天子不同餘人上曰天子亦人耳枉費安用二十七年正月庚戌如長春宮春水二月乙亥還都癸未命曲陽縣置錢監賜名利通乙酉上語宰執曰朕觀唐史惟魏徵善諫所言皆國家大事甚得諫

臣之體朕自卽位以來言事者雖有狂妄未嘗罪之卿等當言而不言若有所疑夫君臣無疑千古嘉會朕見緘默不言之人不欲觀之矣宰執無以對丁亥命沿河京府州縣長貳官並帶管勾河防事及免中都河北等路農夫被災者差稅一年衛懷孟鄭四州塞河勞役并免今年差稅己丑諭宰執曰近侍局官須選忠直練達之人用之朕雖不聽讒言設使佞人在側將恐漸漬聽從之矣又問寶坻尉業括特末也清廉未知爲政何如幹特刺對以部民多所稱譽但未知主何一事上曰凡爲官但得清廉可矣安得全才可進升爲令又言朕時或體中不佳未嘗不視朝諸王百官但有微疾便不治事自今宜戒之丙申命罪人在禁有疾聽親屬入視三月乙卯從尚書省言孟家山金口關下視都城百四十餘尺恐暴水爲害亟命閉之四月丙申

如金蓮川辛丑京師地震五月壬子詔罷曷懶路所進海葱及太府監日進時果因言國初風俗淳儉居家惟用布衣非大會賓客未嘗輒烹羊烹豚嘗念當時節儉之風不欲妄費今惟上林諸果三日一進庚午有旨問所進御膳味不調尚食局直長言臣偶聞老母病劇私心憤亂如喪魂魄以此有失嘗視臣罪萬死上嘉其孝卽令還家侍疾俟平愈乃來七月壬子秋獵八月丙戌次雙山子九月己亥朔還都上語宰臣所過州縣其小官多幹事益朕前嘗有賞擢故皆勉力以此見專任責罰不如用賞之有激勸也十月庚辰齡享于太廟十一月上因平章政事崇尹致仕語宰臣曰卿等老矣殊無可以自代者願右丞相汝霖若卿亦右丞相所進襲及汝霖同對臣等苟有所知豈敢不言但無人耳上曰春秋諸國分裂土地褊小皆稱有賢今朕自

勉庶幾致治他日子孫誰與共治者乎又曰昔唐顏真卿段秀實忠義如此當時大臣蔽而不舉真可嘆也十二月丁丑獵于近郊壬午宋遣使告高宗哀甲申上諭宰臣朕今治理使百姓無冤天下安樂勝於奉道崇佛設齋誦經爲福爾等居輔相之任誠能匡益國家使百姓蒙和不惟身享其報亦將施及子孫矣左丞幹持刺曰臣等敢不盡心第才不逮不能稱職耳上曰人亦安能每事盡善但加勉勵可也二十八年正月癸卯遣宣徽使蒲察克忠爲宋弔祭使甲辰如春水二月乙亥還都已丑宋遣使獻先帝遺留物癸巳宋使朝辭以所獻物中玉噐五玻璃噐二十及弓劍之屬使還遺宋曰此皆爾前主珍玩之物所宜寶藏以無忘追慕今受之義有不忍歸告爾主使知朕意也三月丁酉朔萬春節上特御慶和殿受宋高麗夏及羣臣賀

退宴于神龍殿諸王公主以次捧觴上壽上驩甚以本國育自
度曲言臨御久春秋高渺然思國家基緒之重萬世無窮之託
以戒皇太孫當脩身養德善于持守及命左丞相克寧盡忠輔
導之意上先自唱皇太孫及克寧和之極驩而罷戊申命隨朝
六品外路五品舉進士已在官才可居翰苑者試制詔等文字
三道取文理優贍者補充學士院職任應赴部求仕人老病昏
昧者勒令致仕給以半俸甲寅幸壽安宮四月癸酉命增外任
小官及繁難局分承應人俸癸未建女直大學禁不得收稱漢
姓學南人衣裝犯者抵罪選宿儒高才者充教授給俸與丞簿
等五月戊申宋使來謝弔祭八月辛未還都庚辰上語宰臣近
聞烏底改有不順服之意若遣使責問彼或抵捍不遜則邊境
生事有不可已者朕嘗思之招徠遠人於國家殊無所益彼來

則聽之否則勿強其來此前世羈縻之長策也九月己亥秋獵
乙卯還都十月乙丑京府及節度州增置流泉務凡二十八所
禁樵禱瓢禱抵罪停止之家乙酉上顧汝霖前世忠言之臣何
多今日何少對曰世亂則忠言進今方承平將何所施上曰此
何可拘但古人知無不言今人不肯言耳汝霖不能對十一月
己亥上語侍臣凡脩身者喜怒不可太極怒極則心勢喜極則
氣散得中甚難朕思節其喜怒以安厥身故宮中一歲未嘗責
罰人也庚子詔南京大名府等處避水逃移不能復業者官與
津濟錢仍量地頃畝給以耕牛戊申詔重脩制條上語宰臣制
條以拘於舊律間有難解之辭夫法律歷代損益而爲之彼智
慮不及而有乖違本意者若行剛王令衆易曉有何不可自令
務令明白己酉有司奏重脩上京御容殿上曰宮殿制度苟務

華飾必不堅固。今仁政殿遼時所建，全無華飾，但見他處歲歲脩完，惟此殿如舊。以此見虛華無實者，不能經久也。今土木之工滅裂尤甚，吏與工匠相結，爲姦侵，尅工物。戶工部官支錢度材，惟務苟辦。至有工役纔畢，隨即欹漏者。自今體究重抵以罪。庚戌上語宰臣展近讀漢書，見光武所爲，人所難能，當更始賊害，不思報怨事之。如平日人不見其威容，天下已定，雖不及高祖、英雄大度，然無布衣龐豪之氣。汝霖又言：潮陽公主以言激怒，但笑而受之。其事何如？上曰：光武聞直言而怒解，可謂賢主。若令宣拜謝其主，則非也。癸丑，幸太尉克寧。第十二月乙亥，帝不豫。庚辰，赦天下。乙酉，詔皇太孫攝政。戊子，詔克寧襲汝霖宿於內殿。二十九年正月壬辰朔，帝大漸不能視朝。詔遣宋高麗賀正，且使還癸巳崩于福安殿，壽六十七。己亥，殯于太安。

殷三月辛卯朔上尊諡曰光天興運文德武功聖明仁孝皇帝
廟號世宗四月乙酉葬興陵 自金之興用兵不息重以熙宗
鮮終海陵不道賦役繁興千戈並起內亂外禍貪殘尤甚百姓
顛危愁困殆盡帝久典外郡明禍亂之故知得失之效雖由勸
進一時天命人心所歸從古聖賢所不能辭既而南北講好與
民休息躬節儉崇孝弟信賞罰重農桑慎守令之選嚴廉察之
責却任得敬分國之請拒趙位寵郡縣之獻華華爲治夜以繼
日可謂得爲君之道矣

問曰紛紛記注浮泛無當孰意斯時嘉言孔彰反覆終篇
三嘆未央